


扶

嘉  
聖  
詩  
集  
四



嘉  
聖

丁葑園先生著

扶荔堂詩集選

文芸館梓行

序

古之爲文者不具體不備製不裛  
益篇帙爲所能爲而自可以傳於  
人故漢後名人遺集自藝文所載  
以暨洪芻路子諸本雖互有參錯  
然多不過十卷少亦數卷而止耳



李月一  
宋則必具體必備製而由明迄今  
且必更多其篇帙以銜煩富繩編  
布捆不可底極然而古以寡而易  
傳今以多而反不必傳則又何與  
予少時卽知臨安有丁葑園先生  
能以制舉義雄視海內號曰登樓

一時爲制舉家無不爭相矩步以  
爲楷模而先生則復以詩古文爲  
登樓之宗猶憶登賢書時值先生  
以容臺諸郎主文大河南者間拔  
予於升論之次呼予前而告予以  
爲詩爲古文之道予至今猶能記

李序二  
之而惜乎愛才過甚偶不檢於例  
遂致一蹶而不之振也乃先生以  
拾塵受過驅絕婁粟末之鄉目眎  
松河口吟橘頌猶且流連風物輯  
諸所爲詩別爲一集予嘗讀而悲  
之暨乎

聖天子洞鑒幽抑爲之賜環遂得以  
黃冠歸故鄉閉門撰述於是著等  
身之書而諸體備具哀然卷帙則  
向使先生爲郎舍雞無恙徒徘徊  
二十四舍之間卽或遷諸大秩周  
列華廡亦安能至此然則窮達之


難齊而得與失之未有定也夫玄  
黃繡黼不溢筐筥必致之理也高  
文典冊難以襲致自然之勢也故  
長卿爲文動極閎博而其後以空  
居自謝卽蔡邕劉向諸儒淹通載  
籍而究其所著不過封事奏對與

所傳雜文數章而止何則高倡者  
難爲繼也故初盛之時以簡貴自  
行而羅劉溫李盈縑累幅其多寡  
之數亦可驗矣乃先生詩本黃初  
律宗神景賦擬卿雲辭追景宋而  
至其雜文各見之於班馬韓歐之

李厚四  
間則嚮使編摘未成卷帙未就卽  
鳳毛龍介偶見人間尤足以踞選  
樓而傲文苑而况乎颯颯洋洋攄  
五庫九總而統以成其三十六種  
之勝雖欲不多傳而不可得也今  
聖天子博求名碩將取高文爲華國

之資旣已璧帛到門四輩敦趨而  
先生以高致謝去顧經世華文不  
問顯晦他日開明堂而議封禪諸  
儒援引各有異同安知不復以長  
卿之頌蔡邕之論爲程書也哉

朝霞受業李天馥拜謨



序

古稱三不朽重之以立言此一言者  
居二言之長也語曰鳳凰乘風至人  
乘時時之所駕或德建而功立或言  
立而功德寓焉夫言莫大於五經四  
部而五經四部不能自為其言也言  
以備道者也明天道節王事尚已若



言序一  
夫文周象易孔子志在春秋並有憂  
患之思乎往哲之微言所繇未徃徃  
而絕也漢太史公蘭臺令稟爲記事  
記言之例梁昭明區爲詩賦序記表  
論之衡此唐宋諸家所奉之爲尺度  
者耶雖然諸君子能違其時以立言  
乎能言自我立無關世教可使來者

動其欲歌欲泣之懷乎葯園先生吾  
師也蚤年聞道學有根柢言無枝葉  
以儀部典試中州先生詔諸僚友曰  
歷代對策取士不一法要其大指不  
越明道爲宗使他日立朝勲業甚光  
美文章卓爍並期不負生平所學也  
尋徃例爲試錄後序時方奉爲典型

竟以此錄蒙譴蓋五載于茲有非人情所克堪者初先生處之晏如曰是行也余得同于昌黎子瞻亦幸矣當其時海西之白雁難迴江州之賜環久絕迺先生故國長辭惓惓不忘忠愛懷沙等于屈原諷義同于宋玉悲矣且一意讀書懷古遇物能銘下筆

輒抽瑩經之淵源而繹世史之要領豈徒侈言士安作序已哉其于詩詞則上追周人四始六義之遺下辨元人南呂越石十三調之失詳其體製曾不規規稱建安做大曆者比也是集成總四十二卷余不敏敬誦一過喟然而興曰人生少百年疆半爲憂

虞而增過隙之嘆先生窮於遇而通於道既通於道而不朽於言可謂善立言而不負于時者也及門諸弟子哀輯授梓集成謹命志之卷末

康熙庚申閏秋八月知杭州海寧縣事鄴下弟子訖三禮拜手撰



扶荔堂詩集彙選目次



朝霞李天馥容齋

編輯

鄴施許三禮函山

卷一

五言古詩

雜集

卷二

七言古詩

雜集

卷三

五言律詩

京集

卷四

五言律詩 居東稿

卷五

五言律詩 遊集

卷六

七言律詩 京集

卷七

七言律詩 居東稿

卷八

七言律詩 遊集

卷九

七言律詩 遊集

卷十

五言排律 雜集

卷十一

五言絕句 雜集

卷十二

六言絕句 雜集

七言絕句 雜集

扶荔堂詩集選



仁和丁 澎約園著

蘭陽彭翼宸雪厓

盟津王無忝夙夜



五言古

仿古詩十九首

行○行○萬○里○餘○言○從○雁○門○道○白○日○蔽○塵○埃○嚴○霜○吹○勁○草○生○  
別○在○須○臾○車○驅○一○何○早○送○君○出○重○闔○四○望○天○浩○浩○凝○冰○  
結○衣○袂○晨○餐○無○宿○飽○中○夜○起○徘○徊○豈○若○故○鄉○好○含○涕○還○  
入○房○雞○鳴○日○初○杲○遊○子○不○念○歸○紅○顏○獨○愁○老○

朱止谿日歎行役也風格峻絕關鎖極嚴中寓一段  
波瀾虛實盡致漢代舊譜鴛鴦得此金針暗度矣

其二

初日照高樓。樓上顏如玉。卷施垂新芳。當牕萋以綠。弱  
腕揚輕羅。臨粧自結束。所思在遠方。濯手餘膏沐。黃鳥  
翻然飛。安絃理清曲。良人行不歸。音響何能續。

朱止谿日敘室思也怨情雅遠直逼西京不屬于建

黃初風色

施愚山口風味悠長

卷耳草蟲之遺韻

其三

長安盛車騎。彫甍交廣陌。宛宛路傍葵。舊是王侯宅。津

要勢灼天。時移若轉輓。百歲不崇朝。一去無遺跡。所以  
蓬蒿子。多為寸陰惜。烹葵日飲酒。歛噓亦何益。

朱止谿日弔古諷時之作炙手場中具此冷眼真英雄也

毛萸黃曰宛宛路傍葵烹葵日飲酒此古詩中章法處

其四

明星何歷歷。流水何滔滔。仰視歲序移。凝陰十月交。今  
日良歡晏。烹臠列嘉肴。麗質揚清歌。哀響紛絃匏。主人  
起行觴。客且為我豪。對此胡勿樂。人生若逝飈。良夜不  
須臾。晨光易以朝。遺我藥一丸。無乃王子喬。服食顏美

好柔骨終野蒿黃金高插天不如守故巢

朱止谿曰詩歎久役憂生之情與日俱往也○曉人不當如是耶呼人醉夢為醒

其五

孤桐高百尺托根嶧山岑枝幹凋青霜裁為綠綺琴中  
閨坐愁思纖指發清音按軫移宮羽含意殊未伸一彈  
楚女歎再彈別鶴吟柱促一何悲聽者淚盈襟流光照  
羅幃明星爛錦衾空房易成響浩蕩繁春心

朱止谿曰懷人也○太音希聲一唱三歎此善讀漢詩者自不類煩聲促節諸調  
李湘北曰宛而不萎  
豈繁欽怨歌所能比

其六

灼灼芙蓉花宛宛生江渚溥溥露未晞離離袂輕舉  
衰之有餘芬采之不盈筥當風擘巾帶惆悵心自許願託  
長相思含睇眇愁予

朱止谿曰自傷忠愛而不見於君焉○君子身分高不輕許人正妙於自寫照古詩贈子以目愛如是如是  
宋轅文曰嫋嫋餘音含情無限

其七

彼美繁華子羅綺何翩翩挾彈策鳴騶游戲宛洛間要  
結意氣傾投分在一言風波忽相失棄我如草菅寒秋

白露下客子衣常卑。慷慨亦何為貧賤。良獨難黃鵠刷勁羽。彷徨誰見憐。

朱止谿曰刺退交也正人身分卓爾故在宋荔裳曰交情溫厚怨而不怒確是漢音黃初而後鮮不奮臂拍張矣

其八

草生磐石下。結根在高原。松柏有同心。女蘿知纏綿。與君締新婚。惠好同車駟。固匪桑中期。青鳥逝不還。穠華灼桃李。春風一何繁。鴟鴞吟高枝。蕙草日以殘。良辰坐銷歇。擊鏡私自憐。君子念行役。賤妾何尤愆。安得託比

翼雙飛入雲端

朱止谿曰忠愛之言也君臣初終之義備矣起手風興較古詩冉冉孤生竹結根泰山阿更翻出一層興義矣

其九

青樓臨綺陌。阿閣雙重扉。園中桃李花。蝴蝶參差飛。佳人撫清瑟。絃促令人悲。悽音感百卉。微風動羅幃。坐歎凝脩蛾。未知所思誰容華。不自惜零落。隨春暉。

朱止谿曰傷不遇也正於撫琴不彈處見之梁蒼巖曰不知所思誰質古太白不知心恨誰情直而露於此辨漢唐之分



其十

耿耿牛女星。漫漫隔天路。依依沙河漢。迢迢不能渡。中夜遙相望。所思在南浦。馳情一水間。因風自泗沂。相見會有期。何惜朝與暮。

朱止谿曰懷舊恩也所思在南浦千古交情正於初別時較濃動人百思耳

其十一

晏歲日苦短。人生信無涯。出郭步念之下。見塚纍纍長。臥奄豐草未識身。是誰蟾兔墜東井。羲御倏已馳。諒無盤石固。曷不乘清時。去日杳成昔。來日何能知。骨朽隨

物化。令名永不移。睠彼羨門子。一去無返期。

朱止谿曰詩歎逝者立身貴早也益知仙游之妄彭雪厓曰去日二語令人骨驚

其十二

東城鬱嗟峨。上與浮雲接。白日結層陰。悽悽孟冬月。繁霜殞秋草。悲風一何冽。極意當歡娛。胡為日愁悵。燕趙有名姝。皎皎如冰雪。羅帶隨風飄。芳香暗相襲。皓齒揚清謳。激楚音淒切。流盼蕩人心。含情逾脩潔。引領寄綢繆。寒裳渺難越。願為瓊樹枝。以慰長饑渴。

朱止谿曰思不忘故也苦進前而不御却非風騷變聲

其十三

步出北邙山。松柏翳浮雲。野蔓抱根株。蔌蔌延墓門。石馬嘶晨風。狐兔將其羣。不知何年代。中有千歲人。貴賤無賢愚。淹忽昧朝昏。行者不見知。哈沓向此顰。人生同逆旅。地下常久存。

朱止谿曰達生之言何曠兩晉士大夫酒中裸袒挽歌以為樂漢風其衰矣

王夙夜曰意旨本於莊生而措詞特警悚

其十四

親故日以疎。行路日以戚。短日續長夜。暮歲相追迫。華

屋成丘墟。荆榛蔽城郭。悲風吹白楊。天地各改色。獨行寡儔侶。豺虎更相索。願言返故廬。躑躅將安適。

朱止谿曰行路難曲也憂而不困志士取正焉

陸冰修曰蓋諷汨沒世途往而不返者危言悚聽老大徒傷讀此得無猛省

其十五

前堂列歌舞。極宴羅盤餐。有酒旨且柔。葡萄錯其間。眾賓各言醉。但坐且勿喧。朝權不再榮。蜉蝣無夕妍。為樂須及時。皎髮被其顛。安得翻日車。令君長少年。

朱止谿曰古人進德修業並欲及時也不當與歎老悲憂作一例看

其十六

冬暮玄霜至。日月逝何促。遠道寒無衣。留夜理杼柚。錦  
衾爛流光。展側餘芬郁。良人處天末。夢寐遙相屬。瑟瑟  
羅牀幃。彷彿聞膏沐。嬾婉多新歡。容輝死如夙。朱絃久  
欲絕。膠漆誰能續。攜手不須臾。渺渺成獨宿。願言比翼  
歸。長托雙黃鵠。

朱止谿曰。逐臣棄友之懷。以異君之一悟也。屈子班姬心焉寫之。

其十七

孟秋白露降。流星何粼粼。河鼓遙無梁。牽牛不負朝相

望天一涯。因何託芳訊。昔與君別離。贈我青銅鏡。鏤以  
雙鴛鴦。文采互相映。光景入我懷。含睇獨愁迸。一心不  
自明。安能悅容鬢。抱此當告誰。沉吟嗟薄命。

朱止谿曰。詩刺惑也。託之青鏡能鑑人心。故惑也不欲自明。此貞臣之志。

其十八

鴻雁自南來。遺我機中書。開緘何所有。伴以合歡襦。含  
情視巾帶。雙環結明珠。明珠四角垂。環乃當中居。短長  
適稱體。馨香懷有餘。珍重意良厚。被服永勿渝。秋風忽  
見御。臨發還躊躇。

朱止谿曰以後二章賜環詩也其歸如幸復如疑上  
臣高懷如潮  
弟澹汝曰諷結語知其却玄纁而甘泉石當時早有  
定見矣鴻飛冥冥倘况遇之

其十九

明月照我牀皎皎弄清靄微風響庭柯彷徨不能寐  
雨雪懷遠方春華視衣帶同心會有時纏綿自珍愛珠玉  
墜泥中詎忍長捐棄

朱止谿曰古詩昔人謂源出國風因列之正聲鳳洲  
先生稱其無階級可尋非也余嘗以六義範之稱正  
聲良是今出葯園子詩以正之知士衡擬作晉風其  
日頽乎

錄別八首

鷓鴣變哀音枯條結繁霜不惜衆芳萎所悲道路長晨  
興整衣帶明星入我堂馬行戀生芻客行思故鄉出門  
誰與懷况復踐沙場羲馭不可停海水不可量或當有  
還期擊髻徒憂傷

王阮亭曰蘇李贈答詩高蒼悲壯於淒宛中仍不失  
英雄本色當時擬爲錄別神氣奄索便已去而萬里  
此八首借古題以抒已蘊音節激昂格調豪宕擬古  
而不泥於古直駕河梁而上之矣

其二

今日樽酒別日歸復何時同稠勸餐飯氣抑難致辭絮  
理不及裝僕夫駕言遲送者自崖還萬里從此馳修途

且局竿令名安所施。微軀固自保。筋力日以衰。老至賸鄉里。饑渴焉能知。

其三

榆關眇天末。海盡山亦窮。天地各異色。慄烈無春冬。徘徊顧大野。流水咽不鳴。我馬行且疑。浮雲縱復橫。涼風凋枯桑。榮瘁若轉蓬。烈士發浩倡。慷慨難為容。

徐健菴曰。起手聳突全作勁挺孤蒼矯然卓立。

其四

灼灼池中荷。下有雙鴛鴦。蒼莖在空谷。移植乃不芳。與

子同衾影。何為天一方。悲來無意緒。刺促戒嚴裝。匹帛手自縫。有時倒衣裳。白首以之期。中道忽已央。容輝詎堪惜。亮節固所臧。休言生別離。泉下莫相忘。

魏環極曰。古詩努力愛春華。此云容華詎堪惜。以擬子卿別婦之作。更婉而貞矣。

其五

嗟余遠行客。胡為向邊庭。白日澹無光。鴻雁相悲鳴。上坂眺長河。颯沓蒲葦冥。念此同心友。形影共一身。舉袂示還期。躑躅側耳聽。斟酌聊自寬。信誓難具伸。抗手辭親故。感愴行路人。

會青藜日白草黃沙黑  
雲愁霧望之迷離滿紙

其六

黃鵠四海飛。脫翮委中路。朔風東北來。言從駿陽戍。人生非麋鹿。安能日相聚。杖淚別所歡。徑行不再顧。陌路易以新。衣褐易以故。安得交瓊枝。鬱陶誰與訴。

其七

雙闕何嵯峨。俯對西山岑。九重交綺疏。冠蓋日相尋。長跪再拜辭。涕下橫衣襟。何來兩悍騎。要我宿莽林。愁我絕域老。貽我千黃金。持此意良厚。安知去國心。攜手上

河梁。翻作游子吟。悲風颯然去。千載誰知音。

其八

朝出城東門。征車何般般。送客黯無色。強辭慰我顏。相憐復自痛。不久當回還。十里各分手。弔影身獨單。水涸白石見。去馬知天寒。安居不云樂。行役良苦艱。寄語同袍子。努力須盛年。

沈繹堂日都尉送子以賤軀黯澹而悲相憐復自痛直是刺骨語

朱止谿日子陵去國班姬辭宮當日情事不堪回首想其風興朴直怨而不悱竟與蘇李錄別詩伯仲

丙申歲三月初抵長安作

十載棲蓬門。閒居戀幽壑。東髮耽詩書。少賤恥落拓。遊  
說從遠方。索處無負郭。氣傾孟公交。義重侯生諾。掛杖  
五嶽間。窮年抱疏屨。懷玉干明時。披褐靡終托。冠蓋耀  
名都。駿馬馳京洛。遐矚燕昭丘。風雲恣歎薄。龜組匪稱  
身。無材亦縻爵。穠華灼舊蹊。與田杳如昨。鼎食非夙謀。  
終焉守葵藿。

李鄴園日詠  
寄旨難其穩秀

曉出南苑門與同舍諸寮友

凌晨發南苑。暝色翳朝霽。十里披紫霧。仰見雙闕深秣。

馬訊關吏。皎月吹我襟。玉繩耿城隅。斗杓指昏參。徘徊  
顧空野。當知黃鵠心。簿領日羈紉。微懷曠難任。緬愧貢  
公冠。未抽楊子簪。環澌紛急流。凝霜變層陰。天路浩無  
涯。孰辨浮與沉。信美此樂都。偃仰西山岑。

施愚山日淫佚  
謝顏澤不掩骨

始赴尚書省上龔芝麓都憲

焯煌衆星列。執法耀天衢。出綰蒼佩長。入直承明趨。摘  
文振雅風。警欵成蟻珠。賞音爨下桐。剖璞荆山瑜。十載  
署薇省。獻納裨國謨。公孫罷滄海。薛宣震名都。何爲柱

後冠欲掛尋江湖。

梁蒼巖日弘音亮節似顏光祿答  
鄭尚書作結語更得合肥心事

酬吳司成梅村

風雅久淹沒。延陵抱幽悵。博涉慕馬卿。遐覽追謝傅。羲  
輪躍咸池。羣星燦奔赴。琨瑤厲秋霜。琳響諧寶璐。青雲  
曠千載。鸞鳳相追步。驚飈動紫闥。搖落思玄賦。玉池明  
光草。金莖茂陵樹。宮商紛迭陳。斯音獨節護。

周子做曰其源出自雅  
頌幾於夏玉敲金矣

答王詹事

詹事興北地。岸若干丈松。翠巖龍門峙。舉世懷英風。賜  
書盈案牘。屢詔明光宮。僕作相馬辭。洵忍調未工。孫陽  
重一盼。下駑千羣空。勉茲策天廐。縱轡扶桑東。

初調東省獻薛行屋年伯

秩宗典華盛。式和作世儀。清音理朱瑟。雍肅光壇壝。罌  
石秦登封。汾鼎漢祝釐。珥筆颺鉅文。曜彩翼長離。振辭  
邈太古。屹突响嘍碑。綿蕞陋叔孫。聚訟黜賈逵。禮樂興  
百年。惟公奠蕃維。

王端士曰典穆之氣字字  
矜貴不肯落漢魏人以後



讀東谷詩簡白侍郎

白公秉清峻。端委協衆妙。攬撫東觀書。漢紀成華嶠。卿  
雲煥。鼉采瑚璉。蘊彌耀。雲門振雅聲。鐘石克諧調。伶倫  
有奇術。幽響窮篠簞。遐哉薦登歌。朱絃越清廟。

寄宋玉叔時分守秦中

海濱有奇士。矯矯雲中翮。夕宿青瑣闈。朝發臯蘭陌。稅  
駕遊渭南。辛苦歌行役。危嶺舒阮嘯。巖巘凌謝屐。濯足  
隴水咽。晞髮洮雲瀉。桂樹夾道傍。偃蹇悲秋客。

王仲昭曰情致舒婉  
似盧從事之贈崔溫

五君詠

雅音不作古道寢。亡僕會遊京闕得。時從折衷同調  
合志爲作五君詠

張補闕譙明

信陽百載後。吾愛張黃門。重拓菟園遊。廣羅北海樽。慷  
慨論時輩。蒼髯隨風翻。伏闕十上書。中夜常扣關。勁翮  
搏秋風。鷹隼化爲鷁。僕也忘年交。相勗寡寒暄。鞬弭大  
梁。都驅車避中原。

趙法曹錦帆

靈岩毓奇秀。趙生奮中州。把酒過夷門。一劍復蒯緱。嘯作鸞鳳鳴。下士皆啁啾。曳裾傲侯王。作賦恥俳優。久抱任公志。未策盧敖遊。願言排玉闥。手挽雙蒼蚪。

巖黃門子餐

二十友巖生。弱冠扃幽抱。同遊宛洛間。神清企叔寶。探挾石室藏。置身青雲早。朝陽有鳴鳳。翬羽挾奇藻。明發排紫宸。俯啄玉山草。浮翳閃羲馭。上得摩蒼昊。金石難淬礪。冰霜各相保。

施學使尚白

方叔神仙才。大隱金馬門。子秉奇服任。誕真其倫白。壁剖塵莽黃。精勵仙根。十載疲執戟。慷慨自言尊。采藿常不飽。何用哀王孫。

周郡守宿來

永嘉界南服。川嶺陟危峭。玉巖歎流湍。盧溪瞰蒼嶠。中有餐霞人。俯石攄奇嘯。飛瀑激空響。衆壑窮眇窕。丹竈凌紫虛。仙都極幽眺。暫與玄鶴期。澄江佇垂釣。

王阮亭日葯園五言多託體於光祿宣城諸作曠逸奔放尤在顏謝之上

歲晏懷景宣效陶和劉柴桑原韻

冬月少塵事。日暮更躊躇。薄寒散郊野。策杖忘所居。松栢已非昨。安知山下廬。旅食寄深巷。曠然成舊墟。嘉穉已就穫。良疇諒新畬。故人重芳訊。念我終歲劬。薄祿難久荷。斗酒安可無。髣髴日以短。親故日以疎。懷歸不嫌早。聊且佇斯須。白年樂吾真。田間常晏如。

趙錦帆曰  
風味獨得

懷宋罔卿轅文顧水部震雉

楚客嫺哀麗。彥先善清綺。中原擅雅宗。雲間得二子。孤桐裁寶瑟。製以千尺梓。玉軫流素暉。清響含宮徵。知音

邈。夔曠淫哇變。溱洧秉籥懷。佳人三嘆詩。人旨。

盧文子曰。立暉詩非君美。無度孰為勞。寸心千古知音。固匪萍泛。

懷史修撰及超

林宗喜傾蓋。貢公羨彈冠。矧余同門友。頡頏雲霞端。摛藻盈鳳池。雜珮何珊珊。翰發蕤朱華。詞湧驚迴瀾。明珠懷袖間。欲報青琅玕。

王夙夜曰  
曲終奏雅

和洪廷尉畏軒宋別駕牧仲贈答詩用少陵贈衛

十八處士韻

陽春邈難和。中夜發清商。石柱鬱嗟峨。金臺翳日光。二  
 子締綢繆。吐詞振幽蒼。關河阻脩轍。宵夢結中腸。雁鴻  
 雲際來。儼然同此堂。南郡界龜渚。廷尉滯鵷行。比翼羨  
 同林。胡為天一方。貽以瓊樹枝。似挹流霞漿。萬里託寸  
 心。安知燕與梁。攜子襄陽編。佐我易水觴。趨朝會京闕。  
 惜別良苦長。晤言足千載。歲月徒蒼茫。

杜茶村曰不欲襲杜氣骨在晉  
 宋之間○結語更高少陵一層

寄答李湘北學士

李生金閨彥。曉曉青雲姿。披襟振柔翰。緩步趨玉墀。彈

瑟命宓妃。清商激桐絲。靈藥就丹砂。赤液光懸黎。斟酌  
 娛衆賓。願與喬松期。諷子明月篇。逸氣凌九疑。

許酉山曰王中令之贈顏云清氣溢素襟交  
 情溫厚若斟酌二語相期不足當千載耶

金長真觀察偕宗鶴問諸子同遊攝山見招未赴

和方邵村韻

征旆遠行邁。繁霜肅芳甸。泝流下京口。金焦歷遊徧。黃  
 蘆夾湍岍。青鳥紛疊巘。橫江日夜流。山川幾回變。遙睇  
 栖霞山。參差梵王殿。塔影生樹杪。峰根出波面。斜暉翳  
 長坂。蒼然若飛練。佳境常夢遊。裳邈難見。招搖指孟

冬漸觀春陽轉。芙蓉不可採。靡草茸如線。弔古情易哀。  
况復經新戰。榮枯倏代謝。流光迅奔電。使君命遊展。未  
獲巾車踐。習池縱欣賞。華林侈公讌。少文洵遊侶。方干  
擅詞彥。揮翰旁無人。風雲任舒卷。惜余把釣遲。徒切臨  
淵羨。沉酣混漁樵。努力詩格健。白雲知我心。滄波獨依  
戀。

### 五賢祠懷古

巍堂聳山麓。森樹恣仰俯。衆鳥鳴春條。浮雲翳遠浦。前  
賢蒞此邦。淑美相踵武。文藻麗幽岑。惠風暢華塢。蘋蘩

薦旨羞。都人式歌舞。羣哲逝千載。潛光薄簪組。况復嗟  
遷客。嬉遊互賓主。異代邈難合。奇懷共風雨。美人中夜  
來。蕭然在環堵。寒裳欲往從。臨流採蘅杜。

吳藺次曰予與葑園金昌亭同賦此詩清芬雅潔當推獨步

### 宿清谿登吳莢山

清谿好山色。宛若靈巖秀。遐覽高士踪。遁世侶猿躡。  
步縱廻岑歎。泉石齒漱飛鳥向。我鳴松葉墮。盈袖杳然  
忘世情。天空坐清晝。

### 爲王丹麓題墻東草堂

扶荔堂詩集 卷一  
吾愛松溪子。半畝欣自犁。城市雖不遠。頗與靜者宜。西  
堂蟋蟀鳴。露下披卷施。莽煙吐奇色。臥石多古姿。客暮  
抱琴來。幽響激桐絲。一杯共明月。坐待雲起時。

張秦亭過訪

鳩鳴幾何時。苔草綠已希。惜別山中人。三見桃花飛。庭  
空玄鶴來。翩然啓我扉。云是華陽客。雪髯蕩清暉。燒丹  
合大藥。玉鼎松火微。無求辟穀方。黃精療朝饑。手註逍  
遙篇。真詮豁元機。冥搜邈太古。叅同誰是非。

徐竹逸曰。意聳遐  
外。余獨愛此。調潔。

扶荔堂詩集

仁和丁 澎葯園著

懷州賈光烈雲谷

襄邑梁 建南侶

輯

七言古

元日早朝太和殿賜宴歌

羲和光射雙闕高。雞人唱曉銅鼉號。玉曆初開正元朔。  
五樓天樂垂雲璈。紫袖昭容引龍袞。虎賁鶡尾陳星旄。  
內閣傳言賜春宴。千官蹈舞延休殿。捧出金盤御饌鮮。  
擎來碧甕葡萄見。朝官盡佩鷓鴣勺。小臣昧此眼空羨。

踧抱銀鬕仰入唇淋漓滿袖真珠濺。至尊笑盼龍顏  
開。歲首欣逢九重眷。宴罷承恩渥。遇希朝衫未脫馬爭  
飛。手提鳧兔懷梨栗。如扈長揚射獵歸。歸來休沐春城  
邸。綵勝辛盤春霧裏。東方割肉細君知。羅威進果高堂  
喜。山妻禾解頌椒花。穉子歡呼識拜起。共樂昇平大酺  
時。御賜分頒退食遲。聖主恩深歌湛露。羣臣慙和柏  
梁詩。

沈繹堂曰。端整中復饒悠揚曲折之  
致。若初唐諸大家未免過於排麗。  
高澹人曰。岑文本奉和正日臨朝。鋪張宏藻。殊乏風  
骨。此作寫雍熙歡洽景象。情致宛折。令人目舞色飛。

送魏環極光祿省覲歸蔚州

十載向北闕。幾人辭玉京。秋風雁門道。悵望代王城。代  
王城。高滿烟霧城。下蕭蕭。白榆樹。崎嶇關塞歸去來。獨  
向臺山深處住。羨公英特心。膽雄少年躍馬明光宮。殿  
上欲折朱雲檻。政府恥頌平津功。披衣起草夜未旦。諫  
書百上無雷同。朝回馬上戀山色。仰天直注雙飛鴻。飛  
鴻南來雁飛北。久厭承明歸不得。長卿病憶茂陵居。沈  
炯懷親愁異域。抗疏陳情叩九閭。天子咨嗟動顏色。  
公也拂袖思故鄉。斑衣如新客滿堂。青門再見祖二疏。

峻坂且復迴王陽。桑乾水急沙石溜。恒嶽峯寒朔風吼。  
採藥尋山恣往還。服食丹砂各長壽。余亦高堂有老親。  
捧檄風塵慚下走。送君此歌莫輕擲。願乞黃精遺我母。

楊猶龍曰婉而旨

秦畱仙曰風旨切擊寫光祿北堂之思足補南陔采

蘭諸什

碧峯道人歌贈祠部陳員外

道人胡爲棲碧峯。峯頂亂削金芙蓉。避世移家碧峯住。  
千年老樹成真龍。翁本楚人愛楚水。盡日垂竿洞庭裏。  
臨流不羨武昌魚。俯看晴虹山背起。有時山頭跨兩鹿。

掛杖隨意樵家宿。嬾慢無心禮白雲。獨把黃庭三過讀。  
蒼崖隔岸見桃花。寒潭一帶多茅屋。牧兒指翁鄉里人。  
那識明時官要津。神武無冠不須脫。東陵有瓜誰道貧。  
聖明側席採巖穴。弓旌雁帛填車輪。孫登被髮恐不  
免。王尼車上難容身。暫向金門作逋客。破帽寒驢仍落  
魄。年當六十髯未蒼。方瞳廣額雙頰赤。薄俸聊供種藥  
田。祠官暫作求仙宅。服食還丹道可成長嘯。一聲滄海  
白。何時控鶴歸去來。重掃碧峯千丈石。

顧且菴曰不屑規步太白往往神合



長歌酬錦帆尚白

長安街頭日走馬。秋憲門前馬齊下。同舍爲郎三十人。盡屬西曹振風雅。大梁趙生氣若虹。金石拊擊聲摩空。宣城施子意不薄。吞吐胸中半丘壑。僕也驅馳伯仲間。拍肩奮袖都歡顏。琵琶手弄紫襦裂。玉瓷倒盡犢鼻還。意氣相期在千載。傍人視之如等閒。罷直歸來呼我友。終繹新詩滿人口。酒後狂歌怒馬鳴。夜深急雨蒼龍吼。俗眼睥睨安足論。海內詩名吾自有。吁嗟吾徒聚散劇。可憐脂車勒馬同朝烟。一麾出守心惄然。轉矚各駕雙

虬。駢黃金之勒。珊瑚鞭。東方梅福俱神仙。朝參嬾赴疲馬旋。黃公壚頭醉却眠。囊中笑索新俸錢。

顏修來曰。忱慨豪岸。身分獨高。白雲司中。千秋勝事。應與濟南太倉相接席。

括蒼太守歌送周宿來之郡

括蒼太守才且賢。十年執戟金門前。平明趨直日宴罷。開襟對客常翩翩。一官不調嗟迤蹇。四十專城未應晚。新加大郡辟薦多。甘走巖城心獨遠。太守黃綬腰帶新。見君狐裘僅稱身。太守高車蔽原野。君來一疋花驥馬。策馬披裘漫何意。拂袖長安如脫屣。欲求勾漏覓丹砂。

定屬南明仙府吏。仙都磊落千丈松。對面削出青芙蓉。此中坐臥滿佳氣。瀑布時倒雙飛龍。酒酣俯踞盤石下。却羨山城少戎馬。廳事無多吏散稀。半壑秋風恣瀟洒。噴雪亭邊古木疎。朝憑案牘暮把耒。羊公豎碑近安在。文翁化蜀今有無。斲藥願逢紫英髓。養生且讀黃庭書。朝廷注念二千石。不久賜璽將何如。太守聞言色飛越。再拜躊躇去京闕。明朝郊外五馬迎。有時復挂西山笏。

土印周曰格調極意新脫欲於高岑諸家別開生面素存曰作法本王右丞送崔五太守而波宕尤勝

### 風霾行

今上御曆十三載。三月旬日風晝晦。詔問有司災異

狀。法部郎臣昧死對。臣聞漢帝除肉刑。醴泉溢出芝草生。秦時赭衣常塞路。日蝕星移失恆度。古來祥青信有諸。劉向李尋數上書。丞相席藁請避位。帝曰咨爾言非虛。方今陽和布大澤。雌蜺晝見飛沙赤。馮夷擊鼓蚩尤爭。太乙靈壇詛風伯。秦川地震三輔霜。郡邑不敢追流亡。宿春未給縣官稅。更煩徵調徙燉煌。鈞考參連不知數。譴卒稍遲督郵怒。司空歲滿城旦書。廷尉門填桁

楊路殷宗解網舜好生。聖朝尚德復緩刑。黃麻如飛。  
 赦書下。父老涕泣祈昇平。帝省齋宮天可變。風不鳴。  
 條世清。晏蒼鷹乳虎投遠裔。赤鳥應集靈和殿。臣等披。  
 瀝。惶恐言。陛下聖明制曰善。

胡荊潭曰絕似一封上陳災  
 異疏葑園忠悃可稱詩諫

施愚山曰紀年之作有稗史闕白樂天元和歲在卯  
 六年春三月月晦寒食天天陰夜飛雪韓退之元和  
 六年春寒甚不肯歸河南二月末雪花一尺  
 圍起手與此詩同其警拔處固可壓倒韓自

洗象行

南荒有巨獸曰象。剉齒磴研鼻盈丈。細目如豨耳如盎。

貌詭龐然皮色蒼。

去聲

兒童誘之作百戲。擊鼓吹簫勢偃。

仰飽食莖豆滿。大斗給俸猶同百夫長。花裙蠻奴獨許。

騎馴狎不啻羊與犁。身被錦緞金作羈。屹如山嶽無差。

移。排班朝隨羽仗立。儼然拜舞同軍旗。自向滇南入中。

國異物那得生。西極忽產象。犢姿態奇。雪齒霜毛如拂。

拭。黃袷飛馳報。大內御駕親調動。顏色炎蒸急雨。

翻白波。詔賜洗象西城河。高旗大鼓引導出。路傍觀。

者肩相摩。躍踔奔湍氣。籠莽蛟龍掠沓爭相向。僚官僉。

點。二十八掉尾旋蹄。各異狀似鑿。昆明習水戰。翻身搏。

擊吹飛浪我聞瑤光之精。化汝形黃門鼓吹充掖庭。乘  
之以戰利身毒負可致遠。垂山經執燧况能却吳楚。胡  
不催鋒弩力掃除南服無羶腥。象獮象獮吁嗟汝莫患  
占費官芻供養參時時挽出天廐中常得龍顏增顧  
盼。

王昊廬曰如峻坂回驄奔騰  
蹕屬於顧盼間忽露神采

贈王鶴山給諫

王生古貌性倨儻弱歲同學差少長落筆橫掃驚千人  
歛薄雲霄氣芒矜眉間躍出雙飛龍七尺昂藏久倔強

同來射策鴻都門聖明側席制臨軒草莽小臣罔忌  
諱淋漓直灑千萬言在庭囁嚅不敢上賈生痛哭遭時  
謗秦郵王公雅愛奇密表龍顏厭羣望九重深契  
王生賢執戟常侍黃扉前鷹隼摩空爪牙捷城狐社鼠  
徒迤邐一疏排天朝野震秋霜颺烈風霆迅海氛方熾  
走盧循江湖肯復容蘇峻滿庭持議念封疆忍令孤忠  
死輿櫬聖主終憐爾骨鯁風波九死全腰領械索未  
脫廷尉門片紙才出中書省袖中短章誰姓氏又待平  
明謁天子

徐敬菴曰寫黃門愈直處曩  
眉畢露讀足詩想見其人

贈洪畏軒儀部

開國功出誰衛霍。前有定南後經略。鵠印高懸大將旗。  
龍城盡闢名王幕。護羌都尉戰力阻。花門將軍心膽落。  
金書鐵券列鎮開。一代風雲縱歎礪。洪郎年少眉宇雄。  
彎弓躍馬如飛搏。袖中常出兩都賦。手內獨挽雙繁弱。  
豹略未許秦白公。腹笥尤堪晉習鑿。高議蘭臺指掌間。  
白虎羣儒氣凋索。叔孫綿蕞不足數。買遶馬鄭同糟粕。  
君家父子何太奇。擅盡鴻都與麟閣。相業爭推僕射王。

功成復並汾陽郭。郎官執戟亦不薄。利器由來試蟠錯。  
建議如山力如虎。阿世胡庸有畫諾。排天摩野霄漢姿。  
勁翮凌風逞雕鶚。百年匡弼倚元臣。勒鼎銘戈繼有作。  
絲綸濟美何代無。看君更取通侯爵。

周伯衡曰韃弭  
慶陽工力悉敵

程生行送翼蒼太史謫學博允吳門

程生冰雪姿。矯若雲中鶴。五載金閨裏。聲名滿京洛。  
朝獻賦不得意。匹馬吳城走丹壑。丈夫意氣恥落魄。此  
身况復甘藜藿。吳王廢苑麋鹿遊。蘇臺風雨成荒丘。紅

粧麗人小垂手。白馬少年千腋裘。彈箏醉臥虎谿石。蘇  
小門前數松柏。放逐從教溷酒徒。風塵何處追遷客。盤  
中苜蓿青琅玕。月明猶帶金莖寒。薄宦寧爲戀升斗。其  
如未掛頭上冠。羨君行矣轡在手。余將拂衣君信否。熟  
膾鱸魚滿貯酒。不早歸田亦何有。明日南來尋我友。

龔芝麓曰得李頎之  
秀逸而蒼深獨見

聽石城寇白絃索歌 并序

金陵寇白本平康樂工女也十三善爲秦聲妙  
極諸藝靚容纖飾傾動左右王孫戚里諸貴人

車騎填狹斜間後爲故元勳朱公國弼采充後  
庭樂伎一時教坊名部爲之寂然迨金陵陷沒  
籍入長安尤工胡笳箜篌宿所未試者然憤懣  
不得志而里中諸舊遊咸追慕物色得之屬其  
父廣募數千緡贖歸故里已流落十年所矣姬  
每抱樂器爲予述舊事泫然而悲其音多關寒  
之聲哀繁怨黷不可禁止因譜爲歌以節之并

隸樂部焉

教坊新翻十二部樂器特數箏琵琶金陵寇姬好手指

亂撥驚風吹落花。自言生長秦淮里。家住朱門夾流水。

掛壁湘絃。鶯管長。文窗書鎖。鴛鴦綺。崑崙琵琶。李暮笛。

手揣心摩。窮此技。春江三月。可憐時。油壁青驄。夾道馳。

燈前含笑。嬌無語。月下聽歌。出每遲。粧成自惜。千金意。

盡日樓邊。折花戲。停鞭愛看。張公子。挾彈從遊。寶車騎。

侯家邸第。填朱輪。斗量明珠。不計身。舞袖長迴。趙李座。

歌管時傾。鄂杜春。黃塵碧海。多烽鏑。粉壁雕簾。芳寂寂。

金縷能牽。李綺愁。絳帷永抱。韋郎感。代馬長嘶。踏錦花。

月。明。夜。夜。聞。悲。笳。隴。頭。風。咽。蔡。女。弄。虎。撥。塵。封。穆。護。沙。

都下喧傳禁中曲。玉手搗來絃柱促。五絃趙璧爲弟子。

二十五聲隨調續。綠腰軟舞銀甲紅。金絲瓊柱相磨礪。

出破入破少蟬緩。大遍小遍無雷同。此曲傳言玉宸殿。

回波簇拍紛難見。錚錚細作金鐵鳴。絲絲散亂如飛霰。

翻聲忽變涼州徹。前若驚鴻後啼鴉。羅襪偷彈塞上塵。

綠鬟猶裹沙場雪。十載關山得此聲。遷客愁聞淚嗚咽。

曲終酒闌鐘漏稀。寒風白日吹滿衣。長安城高蘆管急。

惟爾征人歸不歸。

吳梅村曰。低回宛轉。音節淒清。琵琶長恨。而後誰能作此聲調。

毛稚黃曰歌音流暢序句簡峭  
絕似劉賓客非張王樂府比也

湖上酌酒歌介周櫟園司農六十

孤山亭邊霜葉飛。段橋西畔行人稀。湖上千秋無醉客。  
酒罏空在聞鳩啼。櫟園丈人東陵叟。十月扁舟五湖友。  
不爲桃花與鱖魚。獨向南屏貫村酒。糟丘初築號酒民。  
旗亭拍手歌橫陳。俯踞高松發長嘯。振衣滄海凌蒼旻。  
占來飲者復誰是最。憶高陽酒徒耳。此中便足了一生。  
杯裏安知眼前事。况有春風香滿船。青山如黛吹曉烟。  
野花挿髻舞鴝鵒。玉瓷莫倒鴟夷邊。君不見中山一醉

能千日。但教縱飲傾一石。十日便醉三十年。直到期頤  
髮未白。又不見。梁市客日沽萬錢。長不惜紅螺。滿引三  
百杯。何必安期酌玄碧。酒乎酒乎。霞爲液。玉爲漿。我爲  
公祝。公且觴黃金。未就顏不蒼。求仙只在西湖傍。而今  
莫被漁舟誤。須認桃源是醉鄉。

宋蓼天曰季膺不羨身後名。太白云。自古來飲者。雷其名。可知千古名流。皆爲醉客。詩與人雖欲不傳。其可得耶。

送孫無言自廣陵歸黃山

三月風吹江上柳。浣紗磯頭勸君酒。送客一樽詩百篇。



長笑攜來滿懷袖。何事忽然歸去來。蕪城亭館非蒿來。  
郟平亦向東陵老。觀濤况有枚生才。君不見多少宦遊  
人。失意五斗折腰長作吏。老大風塵未拂衣。欲賦歸田  
苦非易。君是淮南老逋客。何惜他鄉遍遊展。屈指浮丘  
丹鼎成。仍傍靈岩作仙第。落拓辭家二十年。灞陵秋草  
鹿門煙。山中猿鶴如相符。三十二峯頂上眠。

屈翁山曰宦遊一段說盡古今遷客之愁其寓諷閑  
遠映帶有情不遜李願送王道士還山作

和韻酬宗七鶴問

宗生扼腕憐予謫。昨歲同作蕪城客。花船載酒問毘山。

日出瞳瞳城未闢。城邊楊花飛可憐。栗罽細轉紛紫煙。  
扁舟欲擬五湖棹。坐挽先施歌採蓮。犢鼻峨眉兩憐愛。  
芙蓉不減當鑪態。散盡千金返舊廬。囊中惟有隄麋在。  
予亦東歸不肯住。滄海悠悠更何去。有酒須澆蘓小墳。  
脫冠且掛東陵樹。君莫笑昨日敝屣今朱輪。丈夫四十  
眉未伸。長風破浪君家事。相看豈是蓬蒿人。

陳子端曰奔逸豪放落托瀟灑世  
稱祠部是供奉後身定非欺我

題生青藜尊人傳後

莫為信陵土。寧作韓陵石。子昇碑記存荒煙。杯酒不澆

公子宅不見生公古俠者。十歲能文兼躍馬。賦就欲奪  
雲夢田。劔擊長凌武安瓦。灌夫弟畜朱家奴。乾坤何處  
容腐儒。豎子成名胡足齒。天下英雄君與孤。十戈鼎沸  
若飛電。江南黃犢如席捲。忼慨談兵樽俎前。草檄特膺  
公府薦。片紙能勝十萬師。一身恥爲三語掾。登牀自許  
捉刀人。帳中莫令孫郎見。此時樓船橫楚州。朝議不敢  
申同讐。指揮泣下袁開府。信誓直折寧南侯。功成不賞  
蹈滄海。魯連遺風至今在。歲月俱因戎馬馳。壯心不與  
滄桑改。徐庶還家爲老親。江湖徒釣足閒身。少微星邊

憂處士。秋風原上慟傍人。有子青藜于我厚。是父聲名  
滿人口。飲泣再拜前致辭。乃公佳傳煩下走。倚嗟韓陵  
信陵掩。秋霧烏雀啾啾白楊渡。千古之名何有哉。貞垓  
長。傍松楸。樹予爲此歌。君莫悲。聊作阡銘表其墓。

陳其年曰。激昂鳴咽如聞擊  
筑。其變宕處尤磊落不羣。

送施愚山遊天台雁蕩歌

使君昔愛廬山遊。踏破明月珠泉流。一朝拂袖不稱意。  
翻然振翮橫九州。特羨永嘉好丘壑。率爾擔簦戒行橐。  
東甌太守今謝公。折簡促赴巾車約。我聞蒼玉石梁天

外峯海上突掛雙飛龍。蜿蜒嶮嶭各異狀。空中亂颭青芙蓉。金庭洞天拾瑤草。能仁古刹夸偃松。七十七峯洗空翠。倒捫星斗垂。當曾君身原是丹霞客。更歷仙都訪桐柏。采藥須教控鶴歸。雲鬢不見桃花碧。知君此遊非草草。得遇丹丘人不老。康樂愛僻失龍湫。謫仙徒夢遊天姥。放眼名山展齒穿。求仙何必尋蓬島。弄笛騎牛還鑑湖。山中日月注懸壺。昔人但有煙霞癖。懷裏空藏五嶽圖。

王信初曰宗方城廬山歌秀拔有逸氣此更仙骨冷然迥出雲表

李丹壑曰任華詩手下忽然片雲飛眼前劃見孤峯出移贈此作亦稱太白知己

### 江南曲

江南三月嬌青春。江南女兒眉黛新。日日粧樓折花戲。杜鵑只喚如花人。鬪草香塵連宿靄。畫船更繫垂楊外。同心巧結柳枝毬。腰支斜鞞湘文帶。翠袖風吹暗香度。凝眸愛傍櫻桃樹。不愁寒食鷓鴣啼。生怕花朝風雨妬。橫塘笑指是儂家。金剪初裁紫綺霞。不知陌上柔桑綠。爭試春衫踏落花。

邵戒三曰風情恬逸似花階燕影差池可愛

竹瓦歌和原韻贈宗鶴問

古篆岫巉碑薦福。山中神物千年綠。巉巖大壑采琅玕。  
細把魚腸劉荆玉。花文練質如藍柔。巧製若有天工修。  
良材未剖柯亭笛。箴條不繫任公鈎。豈是咸陽採樵者。  
拾得未央東閣瓦。索靖小楷荆浩圖。摩挲勿用瓊枝灑。  
龍威石裂汲冢書。羽陵奇蠹躡文魚。竹樓遺甍古漆簡。  
光芒璨爛同車渠。筆牀硯几雲霞起。欲瞬安豐電光紫。  
載將海嶽書畫船。省却松花五色紙。珍並唐珪與夏瑚。  
不啻什襲藏真珠。一片寒光剪秋水。千層玉液凝冰膚。

我今作歌爲客豪。客須和我雙成玦。何煩阮瑀哀銅雀。  
不數東阿賦寶刀。遊遍蘭亭嗟太苦。西施浣石鴟夷鼓。  
東南之寶君袖歸。誰云信美非吾土。日暮舟行過赭山。  
長江浩渺水湲潺。少文莫恐蛟龍怒。獨自乘風破浪還。

丘瞻戒日落筆俱成昇  
采可匹退之石鼓歌

吾相行題唐閻思小像

吾相不當封。食貧良足恥。莫若牽車遊。願學鴈。夸子唐  
蒙後裔閻思氏。一官斥廢清似水。文史不如一囊錢。壯  
心鬱勃丹青裏。屠門大嚼且快意。局促蓬蒿何爲爾。而

今畫工寫生少奇。矧志趣神情不相向。朝貴偏爲羽客。  
裝文人愛作頭陀。相雖云物外脫塵俗。反使英雄氣凋。  
喪。唐子胸中何其磊砢多不平。岑婁竊據王愷名錦衫。  
花帽坐上坐。頓令程鄭任卓皆虛聲。堂前蠻奴持筴立。  
亦號封君比都邑。紫貝珊瑚煥列星。明光文錦堆成積。  
陽翟大賈眼欲瞬。慢藏不畏法篋入。吁嗟丈夫置身當。  
如此造化無權鬼神泣。君不見崔烈入錢五百萬。臨軒。  
親賜司徒券。卜式輸邊本牧羊。布衣躡草升中郎。胡獨。  
滅戚長賤日苦愁。蹉跎壯歲更何求。但把黃金寫范蠡。

同君早拜富民侯

洪暉吉曰昂藏磊落不欲向婦人作牛衣泣胸中具此豪放而出以恢諧真令唾壺欲缺

越中送曹叔方歸長沙

越中好山水。終日命遊屐。七十髮未蒼。尚作剡溪客。忽  
然思故鄉。行李不暇擇。歸弄谷口煙。且釣槎頭石。秋風  
嫋嫋吹白蘋。橘花亂落滄波新。琵琶峯外千年月。還照  
三湘放逐人。

姜定菴曰予愛劉文房明月灣尋賀九作七言短什意盡而趣長勸園此詩固堪伯仲

遊桃花山調張少府

若耶草生溪水碧。東風漠漠愁行客。鷓鴣竹裏呼酒人。  
楊柳樓頭好春色。使君載酒烏榜船。桃花千樹紅欲然。  
絳袖如雲滿前舞。娉婷倚笑青瓷邊。洞中不見秦時月。  
水上安知晉代年。勸君不飲復何益。可惜芳菲畱此夕。  
千古紅顏空落花。醉枕西施浣紗石。

彭羨門曰得岑王之逸趣是自風流可挹

真如道人歌贈金溪吉辰生明府

真如道人好黃老。名在丹臺致身早。驂御兩鹿來金溪。  
笑謂人間有蓬島。青霞洞天雙芙蓉。崢嶸萬丈連龜峰。

丹砂應爲求勾漏。此中誰識逢仙蹤。山城坐擁神明宰。  
清淨除煩民俗改。揮琴漫操飛鴻吟。製錦初裁五明綵。  
太末風淳政易成。男耕女織安樵采。黃童白叟連臂歌。  
頻年苦兵今荷篋。室家廬井不自保。我侯蒞止當柰何。  
侯旣蒞止復何有。十月家家貯春酒。華橘旣熟石鱗剖。  
父老歡謳我擊缶。真如原是王喬友。

尋聚遠樓故跡感舊

層樓嶮岷吸雲溶溶。下瞰縹緲之孤峯。巉巖環拱若列戟。  
歎泉倒出雙飛龍。湖山無恙城郭改。老竄突存千丈松。

憶昔高宗常駐蹕。南渡朝廷全盛日。君王吟坐愛此樓。  
月榭梅坡最清逸。和寧門外提點呼。御舟傳喚戲西湖。  
教坊雜進太平曲。六么變賺紛笙竽。王僂角觥林賽舞。  
纏頭亂擲紅瓊瑜。宸遊喜與民同樂。寶騎香車日交錯。  
北府兵厨雪王醅。瓦子勾欄銀鑿落。簫聲忽起熙春樓。  
點花牌動青絲絡。爭看吳儂唱柘枝。山鳥不啼風雨索。  
回不盡之思四百年來往事非。銅駝草深螢火飛。朝朝松柏西泠路。  
何處梨花無燕歸。雲鬟翠飾交龍鈿。熹廟繁華眼猶見。  
居人尚指玉津園。畫船簫鼓喧波面。紅裙低拜鄂王祠。

銀箏細撚平章院。一旦黃塵動地來。綺羅香散成蒿萊。  
獅子巷中土花落。酒市墟荒絡緯哀。樵采時聞歌勅勒。  
粉堞悲笳吹落梅。不見南朝舊鳥鵲。至今長繞越王臺。

鹽官令行爲西山作

樂府附錄

皇帝御極十有二載。鹽官令許君本自相州。以甲科高  
第弘才博學著聞。單車就道來蒞吾寧。一問民所疾苦。  
興善除弊毋覆案。不急以妨民哀仁獎孝男耕婦織風  
俗以淳。二更有探丸技擊咸伏草間併息。荏苒不驚室  
家穰穰市中無鬻子井閭睦親。三穿渠以灌鹵田溝澮

攸。漑。仿。治。鄴。西。門。勸。農。講。讀。舉。孝。廉。公。明。盡。得。其。人。昔。  
 有。文。翁。今。有。神。君。四 邑。僻。處。海。濱。馮。夷。斯。怒。我。氓。其。墊。  
 昏。探。龍。威。冊。刑。白。馬。於。神。海。水。蕩。蕩。歸。崑。崙。五 時。而。旱。  
 麓。甘。澍。大。降。黍。苗。蓊。蓊。故。秋。非。我。秋。春。非。我。春。僉。曰。我。  
 侯。之。德。所。臻。六 賢。哉。我。邑。許。君。民。安。其。業。吏。守。其。職。三。  
 年。而。政。成。謠。於。衢。歌。于。巷。朋。酒。具。陳。上。有。滄。浪。天。下。有。  
 黃。口。小。兒。莫。不。鑒。白。我。侯。之。貞。忱。七 皇。鑒。茂。宰。褰。加。治。  
 行。第。一。畀。之。大。旨。文。纁。入。為。卿。士。允。備。諮。詢。古。之。循。良。  
 無。如。我。君。敢。告。史。氏。以。垂。法。後。昆。八

哀潼關 并序

序曰思宗未造流寇之亂劇矣振武孫公傳庭以邊  
 才超擢關西巡撫遂大破賊于黑龍山楊家嶺等處  
 汧隴之間寇漸盪滅柄軸者嫉其功摘稱疾乞骸骨  
 為罪狀密疏引唐太宗殺盧祖尚事欲中以危法上  
 惜其才逮繫三年及武陵憂怖死勦事已大壞特召  
 公便殿授方畧以督師兼尚書總制賜劍璽公起自  
 園扉練兵措餉旌旗壁壘赫奕東循至雒陽所嚮辟  
 易四路伏發如破竹賊遁入邲望風不敢前時霖雨  
 忽大澍馬足陷泥淖幾尺糧糗稍至輒剽掠賊焰復  
 張攻益急議姑退保潼關以圖恢復乃追擊日馳三  
 百里潰帥懷攜貳援兵絕關門不守遂陷公知勢不  
 可為揮刀躍馬出斫賊身中流矢死之麾下監軍喬  
 元柱鎮將周遇吉皆力戰伏刃以殉秦人無不隕涕  
 夫人張氏聞信知公必死乃命二女三妾赴深井中  
 囑乳媪攜兒世寧去亦躍入井兒匿隣叟家獲全今  
 世寧泣會稽丞來乞予紀其事嗚咽不禁因作此歌



尚書代郡之偉人。專征秉鉞來西秦。獅頭環鎧組細鱗。  
旌旗蔽野楯弩新。赤眉銅馬方橫陳。驍渠摧折丈八釐。  
黑谷洗兵蠟塊淪。棄甲倒戈若奔魏。太華孟門失嶙峋。  
白日墮地光作燐。獬豸蕩風掃塵權。奸肆嫉柄國均。  
一疏排陷累孤臣。朝廷拊髀起寇恂。誓師閫外一旅振。  
鼠子宵遁乘邾屯。洛陽銅駝突怒瞋。靈潦傾洞浹兩旬。  
委糧露積盈萬困。天狼夜吼厓河湑。鼓聲半死遁吠信。  
國殤啾啾泣蒼旻。退保函谷據重關。城門不啟叛將噴。  
城下焰勢如抱薪。手拍赤崑博火輪。揮刀仰天辭北宸。

英風毅魄爲明神。喬郎力戰創滿身。寧武罵賊刳兩齧。  
公之叅佐多絕倫。卓哉忠義亦以均。夫人堂上芙蓉紉。  
從之者誰紛衆。嬪梧楸胥井通。渭津佩環窈窕。晉白蘋。  
複壁藏兒祀勿堙。前朝遺事垂貞珉。蕭蕭風雨荆與榛。  
隴山鸚武愁青春。至今痛哭咸陽民。

蔣丹崖日激昂淋漓如轟雷繞電瀑雨驟  
傾中間幽竅語復淒宛欲絕真詩史也

雷琴篇和張晴峯學使

削桐始自包犧氏。柏皇斲就曰衡華。三尺六寸按度數。  
歷代制造多專家。古琴遺名特奇峭。電鼓號鐘各爭耀。

唐宋以來貴雅聲。雷氏宗工最清妙。西蜀雷迅能巧擅。  
鳴泉恭進宣和殿。更有雷威百衲琴。太平興國重修薦。  
磊落難逢雷隱翁。雷生名動貞元中。六一家藏頗珍護。  
囊題冰雪鑿錦紅。此琴不知出誰手。良材美製將毋同。  
晴峯先生善欣賞。寶器若與神明通。已教端甫傳秋壑。  
自有中郎識爨桐。橫膝摩娑三嘆絕。鶴林秋露無差別。  
尾穴長垂玳瑁銜。軫池倒挽青絲結。拆紋花浪走龍蛇。  
攜來一片寒光雪。太古遺音若逝颺。由來神物如玫瑰。  
瑤勾彈趯撥末技。耳千載知音空泐。溲雲和之製準玉尺。

陰陽律呂伴簫韶。時清應擬南薰頌。好待揮絃和聖朝。  
蔡徵元曰。英蕤鬱蒼紛紜獨茂。此叔夜之賦琴也。詩中變化之妙。具有盤紆隱嶙之狀。

陸梯霞耕田圖歌

大澤爲蛇恥作龍音也。萬卷今老農。陸君磊砢善高蹈。  
勁節昂藏千丈松。一灣河清環茅屋。十畝樓遲耕且讀。  
帶經聊把倪寬鋤。綿上羞稱介推祿。小池種得千頭魚。  
曲徑栽成萬竿竹。慈親色笑兒女歡。高堂儘可供魚菽。  
白蘋紫蓼溪水濱。綠簑青笠趁閒身。春犁秋獲終歲事。  
量晴校雨東家隣。白眼空山少儔侶。我亦灌園遺世人。

暇。蔡。琴。箏。酌。濁。酒。田。家。樂。事。君。多。有。蓬。蒿。二。仲。時。一。來。  
頓。令。忘。却。桃。源。口。腐。鼠。徒。嚇。蒙。園。翁。臥。龍。虛。說。南。陽。叟。  
君。不。見。漁。樵。相。話。在。蘆。菰。謝。彬。妙。筆。今。已。無。恨。不。添。予。  
荷。鍾。立。宛。然。沮。溺。耦。耕。圖。

中秋貢院石垠公方伯招集纂誌同人公晏對月

八月秋氣清中庭露如霰華館娛佳賓良辰列佳晏開  
星。暫。暫。爛。生。光。北。斗。倒。掛。秋。河。長。天。涯。歲。序。逢。今。夕。何  
處。清。暉。共。此。堂。堂。中。更。有。圖。與。史。條。理。六。藝。陳。笙。簧。右  
文。天子綸音重天祿諸儒相錯踵東方十洲恣冥蒐

劉歆七畧刪繁冗瓊樓玉宇天上開那勝人間百城擁  
况有賢侯張綺筵蟾蜍移我几案間滄海光添酒樽綠  
吳越直與高樓並登臨不減庾公興作賦還驚休逸篇  
却過冰輪正三五請君但歌我且舞渡江人傑清談雄  
襄陽耆舊鬚眉古高山自昔本難招不教才子悲鸚武  
德星忽聚非徒然盈虧圓缺何須數但飲休言歸去來  
中宵且盡掌中杯相期復有龍山約留醉還登古越臺  
十九日登明遠樓再集

層樓高插雲嵯峨天萬里琉璃波吳山越水若黛螺

既望已踰三夕。過闌干。菟兔。搖金梭。主人行酒。炙銀鷺。  
鷓鴣之勺。雙叵羅。嘉客滿堂。顏且酡。言談跌宕。若懸河。  
論文不讓。劉彥和。博識直視。蕭摩訶。正字莫辨。魚豕訛。  
碑銘古篆。乳與蝌。手持不律。三婆娑。輕詆難免。季緒呵。  
石渠校讐。同鸞坡。千秋大業。垂不磨。興酣起問。夜如何。  
烏啼金井。凋梧桐。參橫轉落。睇素娥。銅壺箭急。催吼鼉。  
既醉屢舞。紛僂僂。東方將明。發浩歌。露華蟋蟀。喧鳥蘿。  
公等還山。我荷簞。人主樂事。何其多。

楊芝用日雄姿峭句雖似昌黎石鼓不必信曲勢牙而風致自別

### 扶荔堂詩選

仁和丁 澎葯園著

有莘強國藩佉人  
梁苑劉元吉雨章 輯

五言律 京集

瀛臺直奏恭紀

玉殿環清渚。西山拱翠微。九霄停鳳吹。初日閃龍旂。煙  
渺新宮樹。香迎近賜衣。蓬萊塵不到。祇見白鷗飛。

白東谷日初日句  
高壯結更悠然

其二

正。值。齋。宮。日。薰。風。碧。殿。高。天。閑。調。首。宿。冰。瀝。護。櫻。桃。中。  
使。催。黃。勅。昭。容。拭。彩。毫。諫。書。頻。問。訊。或。恐。聖。躬。勞。

何麤音曰  
新麗不佻

其三

輦。路。開。清。蹕。宸。遊。動。曉。鐘。射。鵬。傳。校。獵。憫。雨。念。先。農。仗。  
轉。西。山。翠。珂。鳴。左。掖。松。小。臣。齊。鵠。立。雲。裏。望。真。龍。

龔芝麓曰結構俱從右丞左  
省寄杜拾遺而意境迥別

其四

禁。苑。郎。官。擁。同。趨。鵷。鷺。班。明。河。瞻。帝。座。旭。日。候。龍。顏。

樹。影。波。光。靜。鶯。聲。仗。外。閒。鳳。城。寒。未。曙。早。喜。罷。朝。還。

李坦園曰結語見御朝無  
失時有風人鷄鳴之旨

西。苑。喜。雨。奉。和。金。相。國。息。齋。夫。子。原。韻

西。山。連。宿。藹。海。氣。苑。牆。來。祈。穀。催。靈。雨。妨。農。惜。露。臺。泉。  
聲。飛。瀑。落。樹。色。翠。微。開。莫。獻。甘。霖。頌。滂。沱。徧。草。萊。

陳學山曰莊重渾雅  
如見景龍時氣象

直。宿。西。清。再。和

伏。謁。近。楓。宸。香。迎。滿。苑。春。曉。鐘。花。影。散。寒。食。柳。烟。新。宮。  
闕。移。天。象。夔。龍。捧。日。心。聖。朝。多。獻。替。滄。海。未。閒。身。

秦畱僊庶常招同楊爾寧王印周楊炯如徐荆山  
諸年友小飲

客到攤書興。清宵共草堂。垂帷閱著史。疎鬢半為郎。樹  
冷蜨螿伏。墻陰薜荔長。新秋難遣放。莫惜倒壺觴。

郝敏公曰  
景色幽澹

客夜獨坐懷山中舊友

故人久寂寞。相訊復何如。春到愁中換。交因病後疎。蛩  
鳴方貫酒。月出正攤書。空負羊求意。荒園滿種蔬。

趙錦帆曰疎秀  
頗近兩皇甫

宋中呂司寇祠和王文安公韻

風雨碭城暮。荒祠尚歸然。黃河流故澤。白蔓覆新烟。俎  
豆虔遺老。衣冠儼後賢。殘碑名跡在。知籍蔡邕傳。

沈韓倬曰入格○不作刻  
畫語真慶曆大家之遺

送劉石生之秦

萬里咸陽道。三年復此行。鴈聲寒渭水。秋色上蒲城。日  
蝕秦碑斷。天空漢時平。尚畱雙劍在。風雨試長鳴。

黃次辰曰沉亮蒼  
渾何減盛唐合作

送章載弘令壽光

巖邑望崔巍。荒雲抱海隈。夕陽平野度。秋色亂山來。虹  
掛孤城暮。龍吟萬壑哀。神僊多吏隱。咫尺是蓬萊。

許青嶼日中二聯已入  
少陵妙境結復穩切

其二

朝辭丹闕去。匹馬向東行。樹出田橫島。沙鳴灌子城。人  
烟昏海氣。茅屋斷砧聲。辛苦中原戰。殘疆久廢耕。

送張伊嵩令雲間

張翰江東去。花迎紫綬新。宦遊常帶鶴。歸路豈思蓴。泖  
口逢春早。橫山送鴈頻。應憐作賦客。灑酒問靈均。

金冶公曰三  
四翻意能新

其二

一棹吳淞水。鄉關咫尺間。莫嫌棲枳棘。猶傍鳳凰山。射  
獵新城戍。旌旗大海還。蟠根君獨試。剡邑豈辭艱。

張公選日二首  
有意摩太白者

送胡矜古今臨邑

西望祝融城。揚於塞上行。到關饒魏地。聽角半秦聲。烏  
突餘風古。黃榆秋色清。休言邊境僻。父老傍車迎。

程箕山曰深於  
嘉州不欲膚似

送錢學使赴晉中

秋盡汾陽路。山花照使袍。王晞原駐節。孫楚舊揮毫。地  
扼龍門險。天回鴈嶺高。論文多雅興。白雪共誰操。

其二

綰佩新啣命。除書到晉中。山川雄代郡。文物盛河東。說  
劍龍俱躍。掄才驥欲空。襄陵春釀熟。應念故人同。

祈雪齋居

雪滿齋居日。微風散曉珂。到壇寒却減。比玉瑞能多。袖  
惹爐烟濕。鐘迎羽仗和。迴鑿萃澤野。黃竹動郊歌。

自註時

上還自西海了

劉瑞公曰盛世之音結更雅切

晚出西苑門

傳道回鑿日。銅街輦路分。苑墻翻碧鳥。城堞駐紅雲。候  
火回鵬陣。秋風散馬羣。欣瞻龍馭近。歌吹日邊聞。

秋病書懷八首 比部作

帝鄉秋漸老。客子最關心。自遣無長策。真難惜寸陰。懶  
朝人共笑。耽病酒俱深。不見南歸鴈。空聞塞外音。

孫宇台曰今味結句亦是詩識  
豈宣公忠州之謫亦有定數耶



其二

倚徒空庭暮。堦盈石薜齊。松飈綠屋掛。山槿出墻低。戀  
關慙新俸。逢人話故谿。連朝深夜雨。何地不凄凄。

其三

薊北風烟裏。逢迎意獨殊。虛囊存白蠹。疲馬厭青芻。疎  
拙違明主。行藏信腐儒。遙看銀漢近。歸興滿江湖。

其四

苦憶親垂老。秋風鬢幾絲。露凋墻角蔓。鳥啄桂花枝。難  
得鄉書到。應憐伏枕時。鹿門如可望。莫訝去官遲。

蔣人鴻曰。至性語不堪

再讀何減蓼莪之詩

其五

窮老燕南客。朝朝逐紫宸。宦途原逆旅。生計問旁人。黍  
祿真無補。浮名豈稱身。草玄能嗜酒。休道子雲貧。

其六

禁闕曉蒼蒼。秋空鴈幾行。角聲凋旅鬢。月色認他鄉。苦  
戰山河異。爲郎歲月長。向南遷客少。曾否到襄陽。

其七

西山憑檻出無雨。亦空濛池冷疎。鷗鷺天青吸。蟬竦露

葵寒欲摘。畦菜晚常充。退食歸東省。樓遲野興同。

其八

小閣供虛眺。微風斷晚林。鳥歸雙闕迥。砧入五雲深。書  
卧松杉老。秋來天地陰。滄江愁更遠。日暮苦沉吟。

吳伯成曰。八首疎澹幽折。意到情至。作者箕穎之志。出於性成。讀此可見。

送王山長還楚南

其惜南天遠。相看此送君。一裘雙闕雨。十載九疑雲。歲  
月丹青裏。樓遲鷓鴣羣。明朝綰綬去。離思倍紛紛。

彭燕又曰。一裘二語。數凡四見。益雅鍊益精緊。非老手不辦。

其二

地盡三巴接。將歸南雍州。天空一鴈斷。何處岳陽樓。橘  
樹侵寒雨。猿聲入暮秋。仲宣仍作客。更切望鄉愁。

弟馬水曰。遙對格工。巧乃爾妙。出自然。

送呂蓮洲比部辭官歸宋中

北闕馬爭飛。偏君願獨違。幾人懷綬去。一疏乞骸歸。皂  
帽仍樵徑。黃河有釣磯。漆園曾隱地。聊且卧荆扉。

陳素庵曰。起法兀突。有力全作事。境俱老似。做北闕休上書一首。

其二

欲去冠初掛。愴然思舊游。相憐非失路。何意問滄洲。身  
豈無材棄。官從未老休。遽歸情獨切。汴水應東流。

張譙明日  
淋漓意盡

### 丙申除夕

病懷常計日。客邸况逢春。白髮新年事。黃昏隔歲人。星  
河低北闕。角鼓靜東鄰。對酒渾難盡。明朝向紫宸。

諸西侯日  
三四警切

### 初春憶田園寄弋雲素涵兩舍弟

憶弟多清興。尋山只舊蹊。花源人不到。竹徑汝能棲。野

菜肥堪摘。村醪熟可携。田家春事近。莫恠乳鳩啼。

邵戒三日猶  
見襄陽逸致

### 贈汪員外嵩木

明光趨直罷。向夕未開簾。畫省邀青綬。參軍愛紫髯。香  
含雲欲近。朝退露常霑。滿索東方俸。知君不久淹。

### 慰李琳枝侍御詔獄

抗疏今何事。身危直道難。忽聞收北寺。不敢問南冠。草  
莽臣無狀。朝廷法屢寬。聖明知汝戇。頻取諫書看。

為梁宗伯蒼巖題蕉林書屋圖和龔芝麓尚書原

韻四首

幽居偏水竹。公獨愛山蕉。入幔分清霽。來琴送寂寥。虛  
總含宿霧。高枕弄春潮。已盡滄洲趣。何嫌谷口遙。

王阮亭曰四作風骨不乏而穠華可愛又  
曰高枕句非身在綠陰聆蕩中不能道出

其二

東隅成小築。豈是傲泉林。松菊當杯興。蓬蒿此日心。雨  
昏山鳥悅。夜濕草蟲吟。拂袖清陰滿。偏欣野服侵。

其三

荒徑草堂深。幽人獨醉吟。攤書雲影滑。剪燭翠烟森。風

送雙樽綠。晴分半畝陰。杖藜隨意到。不負灞陵心。

其四

綠野尚書閣。晴牕自穩眠。尋常雲裏樹。尺五洞中天。却  
老黃庭卷。棲真白石篇。風敲幽響細。吹度入無絃。

徐電發曰妙有含蓄  
不言畫而語語如畫

過飲孫忤庭太常

奉常初掃閣。乘興到松筠。暑月山窓淨。清齋野摘新。有  
花多酌我。聽鳥倍懷人。莫惜當杯別。吾今老釣綸。

送柴二虎臣南歸二首

忽漫辭燕邸。冬深到草亭。酒瓢探歲月。藥裹足參苓。鴈  
落吹沙赤。帆開宿雨青。長途寧寂莫。應有換鵝經。

其二

歸去渺何意。故人難再逢。問裝殊絮絮。話別太匆匆。地  
澗秋多雨。裘深晚禦風。此行吳市隱。不久傍梁鴻。

何異子曰五六  
司空圖佳句

送許力臣遊雍歸廣陵

許子東都彥。時名久擅場。賦才探石鼓。碑記辨中郎。芳  
草遲歸夢。春星冷客裝。右文當守意。及早獻長楊。

送黃黼書之任武威

挾劍事長征。蕭蕭班馬鳴。河從張掖遠。雲傍合黎生。才  
子臨戎壯。參軍草檄成。巡行收羗處。應不愧蘇卿。

洪畏軒曰初唐  
四傑有此工麗

逢高念東中丞使楚還濟上

幸值中丞節。還朝問舊谿。黃陵楓葉落。斑竹鷓鴣啼。樹  
密知鄉近。天空望闕低。荆南饒景物。驛路滿新題。

李湘北曰全於寫景中寓意深遠中  
丞望闕之殷奉使之介溢於言外

懷彭城司馬紀子湘

相送江亭暮。離情十載餘。黃河檻外出。青鬢日邊疎。祿薄惟供客。官閒且著書。風烟淮楚盡。秋興倍何如。

送任城陳虎侯刺史予告歸南徐

昨道辭官去。陳情已上聞。斑衣動芳草。白袷趁浮雲。江表歸元直。河干擁寇君。扳車煩父老。能不悵離羣。

懷澹汝弟令獻縣

憶弟蒼烟外。秋空一雁橫。天低雲入戶。水落樹為城。疲

邑能安阜。新詩愈老成。已聞遷畫省。相佇倍含情。

鄒石友曰。情境俱真。措言清令。其曠澹處。何減王藍田。

送友之衡陽

一身僮僕少。雙淚別離難。湍折舟行疾。峯迴雁度寒。雲遮去路瘴。嶺起流官帆。勢隨江轉。衡山九面看。

弟景行曰。與李東川送人之沔陽同出一裕。而結語似勝。

送友之西川

相送南天遠。悲君早戒裝。聞猿過棧嶺。如馬下瞿塘。蠻部情難測。蠶叢路更長。客愁容遣放。郢酒醉何妨。

湯潛庵曰。聞猿二語。工警非少。陵莫辨。

其二

江○勢○掛○岷○峨○三○湘○逐○客○過○酒○香○椰○子○熟○淚○隕○竹○枝○歌○鳥  
語○樽○前○換○猿○聲○雨○後○多○浣○花○溪○尚○在○愁○老○杜○陵○何

陳介眉日淹伊多恣態  
錦江秋色倘悅目前

送人之戎州

憐○君○萬○里○去○知○為○訪○嚴○親○虎○出○從○官○廨○人○行○共○鬼○隲○衫  
叢○迷○燹○道○橘○葉○亂○江○春○消○息○無○烽○火○何○時○還○向○秦

辛柳下日奇情警語筆勁氣蒼張文昌  
擁雪添軍壘收冰當井泉真堪並峙

寓洪光祿金魚池別業

相○國○池○亭○舊○環○流○別○墅○寬○鵝○鵝○眠○雨○足○蘆○荻○犯○星○寒○竹

裏○潭○流○水○雲○邊○隱○釣○竿○詩○成○憶○光○祿○長○把○醉○中○看

其二

名○園○初○賜○日○常○曲○望○春○時○柳○嫩○搖○波○綠○花○深○出○鳥○遲○繩  
牀○閒○貯○甕○石○案○舊○彈○碁○獨○羨○臨○流○意○條○然○濮○上○期

其二

涼○生○凭○水○閣○風○細○引○鳴○泉○心○淨○日○忘○暑○眼○迷○花○欲○然○香  
深○移○簾○近○鳥○度○落○杯○先○不○受○京○塵○污○秋○空○聞○暮○蟬

李石臺日山影水中盡鳥聲天際來此戎  
是語也三作思致遠勝頗饒游詠之趣

長安秋望

極目燕南道。關河氣鬱森。天懸雙闕迴。霧合九門深。吹  
角通遙塞。鳴鞭過遠林。中原休戰伐。戎馬莫相侵。

其二

帝里秋臨早。霜清御路閑。遠砧迴北雁。落日蕩西山。槐  
影鳴珂散。沙塵獵騎還。不知征戍客。幾度望長安。

李匪蓼日二作雄爽英特咄  
咄逼人曹蜍李志對此氣索

督亢陂

地脉中都勝。陂亭勢鬱蟠。函關容隘路。易水走危灘。獵  
騎逢秋壯。烟林入暮殘。悲風中夜起。多為泣燕丹。

樓桑村

昭烈興王地。村原亦自雄。荒墟空翠合。老幹落雲封。事  
業鄉關外。君臣草莽中。居人樵牧處。風雨見遺弓。

吳志伊日三分草昧與沛上歌風約  
畧不同五六深妙可謂要言不凡

酈亭

酈亭遺址沒。故跡水經傳。土沃栽梨圃。津通灌稻泉。橫  
溝連巨馬。白日冷幽燕。不見名賢宅。榛茅正颯然。

憶蘓門山

昨遊攀絕嶺。曾與暮山期。得意峰陰外。坐看雲起時。驚



秋。蟬。噪。急。渡。澗。鹿。歸。遲。空。谷。聞。長。嘯。何。年。採。石。芝。

韓孟一日襄陽風調迥出塵外

宿徹上人禪房

遠。寺。青。郊。外。尋。僧。到。水。涯。竭。來。無。箇。事。且。任。便。為。佳。拂。坐。惟。雲。入。安。禪。與。鳥。偕。秋。空。清。磬。響。木。葉。下。重。階。

朱錫鬯曰蕭條高寄遠有致思勝右丞過曇上人作曹叔方曰三四以晉人佳語入詩大有逸致

野宿

野。宿。何。緣。到。林。墟。小。逕。幽。晚。涼。空。月。過。疎。樹。納。風。柔。倦。

得。繩。牀。穩。閒。因。竹。塢。留。宵。深。須。自。醉。明。日。別。燕。州。

彭雲客曰字字精琢逼真少陵家數

春暮憶家園

種。葯。曾。無。圃。編。茅。亦。傍。湖。柔。柔。催。布。穀。遠。激。喚。提。壺。花。撲。江。春。換。星。移。閣。夜。孤。人。來。看。竹。少。三。徑。或。全。蕪。

蟋蟀

入。夜。空。堦。靜。微。蟲。音。正。繁。感。時。迎。白。露。耐。月。度。黃。昏。急。響。知。秋。老。無。求。託。自。存。幾。番。驚。伏。枕。恠。汝。負。寒。暄。

顧在衡曰咏物諸作纏綿巧妙深得風人比興之義

鷺

遠水沙禽見相憐。湖上秋立長依淺。瀨夢不離滄洲月。色連秋草蘆花隱釣舟。徘徊顧隻影飛去。狎眠鷗。

秋海棠

木落山堂冷。繁花遶砌紅。淺香含夜色。多艷耐秋風。洛浦初分珮。昭陽未入宮。容華長自惜。不與衆芳同。

馮青士曰昌黎咏木芙蓉氣體未道此作固當遠勝

扶荔堂詩選

仁和丁

澎葯園著

鄴下王槐一植初

輯

五言律

居東稿

碭郡張太臨君

隴頭

隴水西流急。陽關此路過。鳴沙迴黑石。橫嶺截黃河。磧裏看鴻小。城邊飲馬多。梅花渾欲折。春盡柰愁何。

龔芝麓曰神似延清宗梅岑日寫景抒情宛折盡態一結更自悠然

長安道

關樹迴雲霄。秦宮鎖寂寥。參侶樓青雀。映香陌紫駟。驕供

帳通鄴社春風小。渭橋游人望京洛。松木暮蕭蕭。

田遜庵曰長安風物如凡案間翠腹清麗摩詰後身傳彤臣曰典麗可誦

洛陽道

伊洛繁華舊。園林勝地幽。池臨修竹密。春逐落花流。女几仙人宅。銅駝公子樓。津橋車馬盛。爭傍少年遊。

魏貞庵曰蕭疎俊逸兼軻河竹溪之勝

申鳧盟曰以上三首整練流麗似初唐王虞風致仍

不失齊梁本色

大堤曲

楚雨秋城暮。行人唱大堤。江流蟠峽外。雲起鹿門西。酒

熟。鱖能美。楓青鳥自啼。山公幾回醉。愁殺白銅鞮。

黃次辰曰語格俱古

慕鶴鳴曰駿駁乎盛唐矣入高常侍集幾不可辨

初至靖安寄邸中諸舊友

萬里從戎路。崎嶇正此行。鴈聲孤斷磧。虎氣撼空城。淚盡。慚兒女。身危仗。聖明。刀環何日約。回首玉關情。

蔣虎臣曰國風卷耳懷遠道而寘周行離憂起止若不能自主風人採之許以為情之正也

余澹心曰虎氣句奇語雄雉身危仗聖明得小雅之旨

東岡

灌木陰。靜誅茅。遠市城。榆烟消。鹿塞穀。雨換禽聲。客

久如無歲山多不辨名。杖藜隨野老。竟日少逢迎。

關六鈴日四十字中都以轉換作勢寫得山川風物性情晦明寒暑氣候一時俱動不數右丞畫中詩也計于山日穀雨換禽聲言氣候之遲山多不辨名見土風之曠濶至刺入真三百篇遺意

其二

有客在菰蘆愁中歲月徂。虛囊生蠨蠸。旅食伴鼯鼯。種樹書能註。還丹道未殊。車驅聞扣角。隨興答樵夫。

梁蒼巖曰起手落七自如二四造語蒼特從東山章得來

陳胤倩曰無一凡音熟字是祠部極意工練力挽詩風者

其三

得傍東岡住。岑陰入檻低。花繁依虎落。月出共鷄啼。飯

木容高枕。編茅只舊谿。近來農事嬾。瓜菜廢春犁。

胡又弓曰通體明秀三四一聯景色迥異天然妙趙雍客曰祠部近詩每于八句中一語必用一絕無屬對排比之跡此少陵之真傳實詩家之三昧也

其四

信是興王地。城郊古木穠。鶴鳴三殿雨。猿挂二陵松。疎

拙違明主。胼胝愧老農。吾廬荒徑近。時見白雲封。

姚龍懷曰三四寫景之雄五六言情之婉首尾勻適允為合作弟泰巖曰悲感蒼渾龍是空同老筆

其五

寂寞餘三逕。誰過共草堂。天低星浩蕩。秋近燕匆忙。藍尾懷人倍。烏皮歸思長。依山聊可宅。莫更問南鄉。

林鐵崖曰。典味悠長。總不欲寄人籬下。孫宇台曰。頸聯寫夏景如畫。造語奇曠。似孟東野。

朝元宮贈苗譙明鍊師

城北霄宮映幽清。禮法壇金光。晨不定。瑤草晝長寒。庭閉三花樹。爐空八石丹。丹鳴鑾。憑想像。時向彩雲看。

梁葵石曰。典麗多姿。諸駿男曰。鍊師爛七。玉立為關東孫許。得此可無矣。

野寺

何代隆興寺。碑荒不記年。鐘沉殘雪外。僧老白雲邊。牛背栖烏定。松根吐蕨鮮。將尋慧遠去。山木正蒼然。

杏王望曰。境地情思俱在霞嶺之表。陸左械曰。凌劉鑠顧得中唐佳境。

送張坦公方伯出塞

昨惜江城別。何堪復送君。關從鴉鵲斷。路竝虎狼分。愁劇須憑酒。時危莫論文。此方春不到。應與鴈為羣。

陸吳州曰。四首一氣讀之。情景凄然。如夜度邊關聽烏七吹角。一結婉戀獨絕。

趙千門曰。合情真摯。語自高渾。

其二

萬里窮沙北由來道路難馬蹄隨處滑山面逼人寒採  
藥屯禾峪尋源脫木澗所居依水住肯作故園看

屯禾脫木

塞地依水園張故宅也

顧偉南曰比山從人面起雲傷馬頭生又關一佳境侯仙蓓曰寫景如在目前從來作行塞詩無此真宛

其三

老○去○悲○長○劍○胡○為○獨○遠○征○半○生○戎○馬○換○片○語○玉○關○行○亂  
石○衝○雲○走○飛○沙○撼○積○鳴○萬○方○新○雨○露○吹○不○到○邊○城

徐原一日真實語即情至語故意態婉摯在嘉州之

上 孫嘉客曰五六新奇當令石破天驚起句兀突足振全首

其四

到○塞○天○俱○盡○東○行○路○更○長○與○君○同○一○謫○相○送○各○他○鄉○瓏

雪○欺○衰○鬢○家○書○截○太○行○躡○踏○顧○樽○酒○大○野○色○蒼○蒼

傅雨臣曰悽惻傷懷山之妍秀自入盛唐神境

李匪蓼曰一氣直下誦入句如一句真謫仙縱

淋漓處結更黯

然動鬼矣

夏日移居

五○遷○無○定○宅○逆○旅○卜○居○難○樹○老○山○根○出○人○希○虎○氣○寒○補  
籬○容○膝○穩○少○雨○足○心○寬○一○任○閒○鷗○立○何○妨○種○藥○欄

王阮亭曰尋常景色涉筆便爾濯七欲新

繆歌起日每寫虎氣颯然令人神動

其二

為農老閒事。傍塞亦。一涯野。摘堪供客。盤餐不問家。雨  
蒸戎子嫩。日覆射干斜。病肺秋能渴。呼兒劇種瓜。

嚴就思日以下數首皆摹擬少陵風致宛爾○五六  
秀絕

胡荅虬日先生躬耕隴上灑然有箕山之風投之買  
田陽羨固與子瞻同一襟懷也

其三

山氣朝來爽。相邀躡屐登。岸花沾鳥沫。溪蘚帶魚冰。野  
莽全甌脫。荒墩半土筋。漁人未歸去。幽興可能乘。

宋荔裳日寫景入興極似工部拙處○二四細琢  
周敷文日槎逐斷水流爲子山佳句此堪並駕

其四

日長村巷靜。客過倍情親。取酒非因婦。呼兒必向隣。松  
廳昏弄月。山鬼夜憎人。送老何餘事。爭看鬢欲新。

張公選日直述當日情事是少陵本色  
陳際叔日婉摯辛楚不減湘纍

其五

夢裏家仍在。存亡敢自知。寄衣愁老母。覓菜念孤兒。牆  
罅葵爭吐。溪昏月過遲。栖鳥驚不定。偏遶向南枝。

黃蘭巖日悲痛語自性情溢出如吟陽帖使人愴懷  
張禹服日後四言寓情于景殊得風人比興之義

其六

亦是高三徑何曾宅一區閉門馴身雀旅食累妻孥覓  
洞穿雲入緣溪倚杖扶隣翁饒野興能醉亦吾徒

黃泰升曰言外有逸思○頸聯屬對渾化蕭疎有致  
彭襄五日老幹蒼然殆秦松漢栢

其七

閉門春欲暮旅病亦多時簷鵲饑爭啄溪花晚自私  
生歸計少揚子守玄遲極日鄉關柳春風好護持

徐山卓曰溪花晚自私襟期何等曠適通體思幽而  
厚的是風騷正系

上情修日護持鄉柳歸思止是不減祠部固善於言  
愁也

其八

茅屋家家雨南山日就蕪春蒿牆欲上晚雀攏相呼或  
可鄉名鄭能將谷是愚掩荆眠鹿在長取對潛夫

桑雨嵐曰景奇句秀筆筆適異當令嘉州失步襄陽  
色汎

韓孟一日春蒿句用樂府  
語新妙是本少陵倒出法

過孫納言山齋

久雨除堦草清秋小築成孤峯數莖屋五柳一先生伏  
枕流泉出開軒宿鳥迎山居無剝啄竟日掩柴荆

盧景韓曰蕭逸如濯濯春月柳  
吳漢槎曰高磊澹雋了邪集中佳調

陳韋齋見過偶贈



落魄看君好。擔囊未是貧。哀深知。庾信形似得。王珣賣。  
卜居非市街。杯籍有隣。夜闌爭話舊。歸興滿松筠。

劉雨章曰反覆真樸如竹窻對語  
卓火傳曰淡然意遠境詣自高

題唐昭回舫齋

隨意卧滄洲。蕭然物外遊。居非五湖水。與在一孤舟。倚  
檻看飛鳥。忘魚任釣鈎。生涯原不繫。長此復何求。

翁渭公曰清永絕倫非大曆以後可比  
羅子約曰一派諷義互見篇法起伏吞吐神似高岑

萬花樓為劉將軍故宅

聞道元戎幕。花樓舊舞筵。鐵衣龍自浣。金柝鳥能傳。天

地兵聲合。山河霸氣偏。蕭蕭臨大樹。時送石堂烟。

竊伊庵曰典雅處却極酸楚調近初唐  
顧九恒曰俛仰憑吊與拾遺過何將軍作同出一體

至日

荒屯風土異。薄暮望郊垆。冬至參芒白。燈昏雪片青。豚  
肩迎伏臘。羯鼓賽靈星。野老偏斟酌。予真笑獨醒。

顧梁汾曰造句託興此真神似空同  
陸冠周曰設色點染俱極新粲望而知非近代所有

野望

野望天垂盡。歸遲日未冥。鳥聲山雨淨。驢背夕陽青。藜  
榻應長掃。柴門不用扃。有書兼濁酒。肯讓子雲亭。

俞夢符曰何其瀟灑可視典客胸中自有丘壑  
孟詞宗曰一幅野望圖非摩詰不能工也

遼海雜詩

割據千年事。公孫尚有城。窟深藏虎豹。風急走鼯鼯。  
上秋翎勁。山頭獵火明。少年空自健。愁說罷南征。

吳蘭次曰格調蒼勁比草枯鷹眼疾更爲高渾  
張用霖曰子美秦中詩蒼以遠葑園居東詩婉以深  
雜咏八首風骨  
韶秀難分瑜亮

其二

河流環塞入。萬里永安橋。直欲凌滄海。無因傍赤霄。窮  
秋煩將士。大雪困漁樵。耕鑿慚衰謝。曾何補聖朝。

媚象方曰崢嶸氣骨壓倒獻吉

沈中立曰結句婉摯三百篇忠厚遺意猶見今日

其三

不見桃花島。青冥斷海頭。戈船迴赤日。火霧改滄洲。五  
嶺仍開瘴。三江未穩流。管寧曾渡此。今得許同遊。

施愚山曰最爲奇麗有江波濯錦之色  
常肅之曰筆興翻騰目空作者

其四

半嶺橫山寺。流泉迴翠微。懸崖水不斷。出瀑月長飛。徑  
滑雲生展。籐穿石礙衣。關心緣底事。聊此坐忘機。

史雲次曰骨健氣老直過東陽  
毛介祉曰三四景異語脆如英英潭霧

其五

本截。解。賊。險。翻。為。虎。豹。鄰。塢。亭。通。鳥。道。羗。種。雜。鮫。人。地。  
僻。多。亡。命。村。虛。易。食。貧。近。邊。無。一。警。不。事。你。和。親。

楊自西曰通首壯健屹屹不羣

陸拒石曰三四聯寫景逼真蒼莽之氣即遠烟斜景之句遜其邁勁

其六

數。遣。句。驪。使。邊。陲。控。制。強。腥。風。吞。鴨。綠。朔。吹。撼。龍。岡。輻。  
葵。真。無。外。旃。裘。尚。一。方。海。東。還。內。地。日。出。見。扶。桑。

李石臺曰悲而壯節音中雅

馮寧生曰似唐人送晁監歸日本詩必推右丞為冠

其七

荒。攬。東。岡。勝。山。川。有。廢。興。百。年。消。戰。氣。六。月。少。炎。蒸。龍。  
起。呼。雲。出。鷄。棲。待。旭。升。籐。蘿。朝。礙。眼。何。似。莽。相。仍。

金紫汾曰托意幽遠不棘不膚

徐武令曰感慨悲壯妙有不盡之意見于言外故其

辭肯蒼涼

雍門墮涕

其八

自。在。分。邊。郡。荒。墩。幾。處。傾。蜂。房。撐。老。樹。虎。跡。閃。空。城。甃。  
井。連。冰。鑿。山。畦。趁。火。耕。折。來。新。戶。口。廿。載。不。知。兵。

查伊璜曰虎氣撼空城雄悍突出虎跡句又復幽怪各極其妙不妨疊見

張祖望日以上八首無一恒語無一恒境誕秀吐奇  
正似傾河駕參珠庭皎潔

男丁辰槃北升重校

孫丁坤謙正字

扶荔堂詩集選

仁和丁 彭葯園著

都城呂 振仞千  
安昌王錫祉子寧 軒

五言律 遊稿

初返長安作

一裘衝雪至。忽見綠楊天。春到長安換。詩從絕塞傳。君  
恩優版築。臣力乏車牽。何日西陵渡。還耕負郭田。

其二

疲馬迂邊路。崎嶇陟薊門。入關天異色。渡水曉常昏。去

日蒼髯盡歸裝亂紙存已希燕市侶慷慨向誰言

施視山日入關二句從少陵無風雲出塞得來卻境真語聳

### 饒陽

歸程頻計日。目送嶺雲長。漫爾驚初夏。翻然懷舊鄉。岸

沙迎馬腹。村樹礙羊腸。獨愧披裘客。江亭晚正涼。

魏青城日東路村墟實饒此景三四固不嫌巧

### 深澤

別路山城暮。疎林我舊過。鹿門雙髻換。驢背一瓢多。落

日低橫嶺。清霜穩渡河。鄉書經歲杳。旅鴈奈愁何。

### 白溝驛

古道臨殘驛。蒼烟望欲迷。荒祠癭樹出。遠水禿鶯啼。地

莽交河北。雲橫督亢西。歸心託飛鳥。遙度夕陽低。

任梁河日客途景色情寓境中右丞詩中有畫信然

### 汶陽旅興貽孔震浮令君

客途淹歲序。城闕見深春。少昊餘風古。防山薦豆新。清

明黃鳥候車馬。綠楊人安邑無嫌累。渾忘旅食貧。

### 其二

漸邇窮桑境。蒼蒼極望迷。城頭汶水斷。樹杪嶧山低。岸

柳。衝。人。眼。春。星。怯。馬。蹄。寓。亭。偏。負。郭。聊。此。作。孤。棲。

蔡崑陽日岸柳春星是行旅真境老於道塗者自當擊節不置

其三

已。徧。東。郊。屐。栖。遲。況。此。遊。樽。饒。穆。生。醴。書。滿。鄭。莊。郵。惜。葉。翻。風。白。溪。毛。着。雨。柔。仙。源。尋。未。得。吾。意。任。滄。洲。

其四

淳。樸。文。宣。里。村。墟。遠。傍。涯。近。城。全。古。木。隔。水。半。樵。家。公。府。閒。亭。舊。君。山。返。照。斜。春。來。鄉。思。倍。不。敢。問。梅。花。

許竹隱日深秀中曲盡汶陽景物非流連陟歷不能作

送孔博士魯石奉 詔之京

公。是。沂。侯。裔。班。荆。此。地。逢。酒。豪。同。北。海。經。論。折。充。宗。芳。樹。燕。山。合。春。雲。上。苑。穠。征。旄。莫。延。佇。天。子。待。臨。雍。

劉瑞公日結到臨雍全首始振

南池九日旅懷同徐電發賦

九。日。南。池。暮。荒。城。木。落。初。晷。交。寒。露。短。雲。傍。菊。花。疎。貧。理。將。歸。棹。愁。攤。卻。病。書。茱。萸。渾。未。折。把。酒。欲。何。如。

其二

物。候。驚。秋。老。天。涯。歲。序。長。其。如。催。短。髻。況。復。是。重。陽。茅。

屋安愁雨。絺衣耐晚涼。雲邊數歸鴈。颯沓已成行。

林西仲曰茅屋一聯極盡  
旅途之況安字尤穩妙

陸吳州水部招同陳虎侯州牧任城署園小集

折簡招山客。頻過日暮時。圍碁安石墅。倒甕習家池。冷  
署秋臨早。疎林雨度遲。無多廳事散。常共野人期。

紀孟起曰輕清  
雅脫王岑正派

其二

相尋官閣裏。乘暇興何如。陸賈談無敵。陳登氣不除。蟬  
鳴殘暑盡。鶴佇暝烟疎。六逸遺風在。城南有舊廬。

其三

十日過君飲。忘歸恣遠探。呼盧慚再北。垂橐少雙南。聽  
竹凭鳥几。看雲枕石潭。莫嫌疎禮法。昔是懶朝參。

其四

水部詩名久。江州雅誼新。酒樓堪任客。滄海未歸人。榻  
仙蠻天近。音書旅鴈頻。秋江蓴漸老。須早及垂緡。

方文虎曰祠部豪興不減似  
王世將倚船長嘯思致甚逸

飲胡吉脩齋中

白日茅簷靜。松風一榻懸。盆中佇幽石。竹外引鳴泉。璞

以知希貴琴因別調傳休嗟淪放後卮酒且盤旋。

其二

慷慨當杯意相看各自知。青山畱醉客白眼混明時。小閣疎秋色荒禽點暮池。他鄉逢九日應訝菊開遲。

徐電發日三四  
是嘉州俊語

峭山橋守歲

暫來依小閣亦在百花洲。濁酒送殘夜黃昏吹弊裘。燭移檐鵲噪星定石澗流。世路逢迎拙栖栖何所求。

懷紀子湘少府

佐郡聲名舊馳驅未易才。淮流三楚斷秋色五陵來。廳事鳥啼寂客帆烟霽開。懷君楓岸隔落日照銜杯。

毛大可日五六似太白非丁卯集中調也

宛上送毛大可之廬陵兼訊施少叅尚白

孤舟同作客別路倍依依。相送自匡返念君何日歸。江城殘橘落楚樹斷鴻飛。好共湖西約予今有釣磯。

陸梯霞曰結句宛約借隱之意溢然言外

登施次仲前輩池閣懷愚山

城南高閣子門對響山泉。一水涵虛白孤亭挾太玄。交





原件短缺

從諸阮客詩向阿戎傳獨有蕭灘鴈朝朝落檻邊

同龔宣城遊響山

載酒尋幽谷。秋高沙渚清。斷橋連菼沒。小艇共鳧輕。月出楓初落。潮生泉欲鳴。臨流發新唱。還憶謝宣城。

沈方鄴日杼景疎澹

和州

西。楚。天。亾。地。山。河。百。戰。存。陰。陵。隨。鳥。度。利。浦。入。江。渾。寇。燹。民。彫。盡。官。租。役。苦。繁。孤。城。沙。荻。岸。落。日。散。高。原。

第一峯日起手蒼健全作有俊鶻摩空之勢

彭爰琴口三四盛唐傑句

其三

堂北秋將暮。丹楓照客顏。比隣殘葉寺。遠樹夕陽山。無恙川原在。難逢歲序閒。風流時代盡。憑弔欲追攀。

其四

兄弟登高晏。天涯共此堂。樹栽今太守。日落古重陽。白袷欲看髻。朱萸醉滿囊。竹西歸路近。野色暮蒼蒼。

宗鶴問日風調流逸洒然自別

為吳介茲題照

空山秋正暮。踞石待詩成。向榻耽幽境。吳均負盛名。白雲携袖滿。黃葉照髯明。何處尋高跡。漁磯亦傍坡。

倪閣公日  
分明畫出

為陶俊公題照

置子空丘壑。相看逸興同。淮陰真國士。彭澤舊家風。賦就吳都日。書探禹穴中。狂來雙眼白。高咏據梧桐。

為同年張卽公少府悼亡和原韻

偏憐張壯武。作賦永懷人。張華作永懷賦帳冷魚燈夜。窓虛燕幕春。葉香魂欲返。花貌畫難真。賴有終童子。他年對白

麟

其二

孤衾寒自擁。殘月正西樓。鏡翠難分影。爐薰不上篝。鵲啼三月夢。蕙轉百年愁。容易朝雲散。人間肯暫留。

林詹亭日句綺而情  
摯非同落葉哀蟬也

修中丞滙白招遊僻園同宋荔裳觀察賦

三徑原稱僻。耽幽十畝園。參軍分廨舍。杜老戀江村。遠寺香臺映。前朝古樹存。長干留別墅。重築謝公墩。

其一

草堂臨水見風景似溪西竹客人難到烟深路欲迷  
寧懸孤澗透野眺青峯齊應傍花源住琴樽好共携

黃庭表日竹客

二句襄陽佳調

其三

更凭高閣子秋色望中來雲向窓間出山從鏡裏開  
芙蓉人舊幕鸚鵡客多才堪咲桓南郡金城柳自栽

其四

山棲非石隱小築爲誰營石貌千層秀波光一片明  
盤飧多野味絲竹有新聲入夜流泉響花稍送漏更

其五

爛醉長松下昔看抱甕眠周顛非斷酒蘓晉豈逃禪  
晚菊墻根吐秋河樹杪懸何須同梓澤文杏斲爲椽

其六

灌園聊自適安分且藜牀欲送歸盤谷何如返故鄉  
棲遲同栗里耆舊盡襄陽不遣臨邛客壚頭換鷓鴣

宋荔裳曰少陵遊何將軍園亭意多

景少六以拈寫殆盡僕慙小巫矣

和韻送筠上人之玉峯

精舍疎林裏荒城可結龕遠公詩自好裴相偈誰參  
飛

鳥隨身鉢摩尼入藏函東遊多振錫應未老瞿曇

其二

筠公玉峰去踏破幾芒鞋日落磬聲寂雲來山氣佳沙  
門傳惠解法界現無懷畱客長煨芋園蔬足供齋

弟次蘭日船裏猶鳴磬溪頭自曝衣  
蘭仙佳語也日落二句足與頡頏

惠山二泉亭和奚蘓嶺少府韻

地闢名泉勝曾聞著水經影分垂露潔流入亂雲青蒼  
檜何年樹殘碑歷代銘家家春釀美應照酒旗星

錢礎日日流入亂雲青與賈  
詩月影在蒲根皆工妙可思

其二

一水如分鏡真堪咏濯纓亭空雲自起林寂鳥常鳴遠  
映春申浦遙環泰伯城居狀塵不到物外倍含情

過嚮城

津橋乘曉渡秋色霧中看風便揚帆直舟移伏枕安木  
棉隨路長沙鳥入波寒望裏江亭樹依依過別灘

韓元少日夕逗烟村朝緣浦樹舟行  
佳境似此輕婉多姿不亞曲江風度

虎丘上巳春雨集酬林天友使君

脩禊山堂靜臨流問虎谿野雲迎綬至岸柳出峰低杜

若帆前綠子規花外啼。遠郊農事好。春甕正堪携。

裴大文曰天然娟秀濯濯如春月柳

其二

高館晝冥冥。長波一望青。鷓鴣分水港。菼荻隱山亭。樹色消春雨。烟光列畫屏。永和饒勝事。詞客未飄零。

遊靈巖山寺

緣厓小逕滑。扶杖老僧能。孤刹依懸磴。危峯抱古簾。鼠窺香案菓。鳥撲佛龕燈。高頂秋無盡。相將躡屐登。

昌亭喜值令宜舍弟

兄弟家何在。相逢各破顏。亂餘存白裕。生計累青山。放艇渾無定。輕裝亦自艱。行行岐路盡。莫說是江關。

其二

崎嶇萬里道。昨歲事南征。草檄無諸國。吹簫壽夢城。敝裘慚短後。老驥困長鳴。令宜作驥賦自悼莫笑求田舍。須歸學

偶耕。

其三

空庭露初下。獨酌起悲歌。明月已如此。酒杯當奈何。胡為彈鋏去。更向賣漿過。交態誰堪問。懷中一刺多。

徐夔庵日情采俱烈  
使君正於此處不凡

題馬隱居靜古山房

徑仄環流水。堂開列翠屏。苔衣迎雨滑。松葉鬪霜青。笑傲看人世。徜徉任醉醒。閑來狎鷗鳥。終日立沙汀。

評月軒

憑闌坐高閣。新月掛遙岑。流影隨圓缺。清輝無古今。花邊長斲藥。竹下可携琴。人跡虛三徑。當階秋草深。

吟望閣

眺遠添詩興。揮杯送夕曛。月升山閣背。星倒水波分。

淺知魚樂。秋空數鴈群。灌園稱抱甕。逸致不如君。

李熙載曰三作語語清俊不減祖  
詠烏啼當戶竹花繞傍池山之句

送梁承篤明府遷劍南太守

昔號神明宰。如君志不違。烽消戎馬少。署冷簿書希。政暇尋烟霧。詩成坐翠微。漢庭褒吏治。不久待綸扉。

其二

九載遷巖郡。花迎墨綬新。延津看合劍。越水憶垂綸。無計攀何武。真如借寇恂。難忘父老意。臨別幾逡巡。

徐松之曰情致穩秀岑嘉  
州送鄭少府作同此風調

其三

相送使君旂。舉帷不可留。荷香天竺雨。荔色幔亭秋。曉  
瘴霓旌度。蠻天露冕遊。王師方奏凱。卧治獨輕裘。

其四

極望闔天遠。清秋五馬東。棠陰懷舊雨。麥秀慰哀鴻。嶺  
抱江榕出。城銜海日紅。炎方兵燹後。憑軾問民風。

吳慶伯曰清蔚簡  
令可方劉真長

西湖夜月和慕瑟玉樞部

月到中宵好。湖心別有天。峰頭雲盡白。波底翠俱圓。映

水清輝近。迎寒皓色妍。段橋人跡少。凝眺盡蒼然。

仙林精舍尋唐闓思炎師小飲

君向招提住。狂吟興未淹。對人無逆眼。呼酒必掀髯。與  
飲公榮勝。將詩小謝兼。胡為歸思切。多是戀長鎌。

羅輝山曰以細事點染將朗  
思逸情高致直據第一流

蕭寺寓齋對雪

深冬盈尺雪。中夜擁禪房。曉色牛虛寂。鐘聲入混茫。迴  
簷迎樹合。入幔引杯長。占歲農家喜。爭如滯客裝。

陳撝謙曰曉色二語高  
渾是唐人咏雪神境



薛相於為予寫花鳥便面作此酌之

憑誰寄芳訊。託意此齊紈。栖鳥閒春苑。叢莎遠暮灘。巨

卿原不負。為周伯衡大仲蔚頗能安。荒渚何緣到。同君

理釣竿。

巖脩仁日  
雅人深致

送孫法曹歸關東

落日散河源。秋風馬度渾。曾傾信陵客。不向翟公門。淚

盡關何事。心期共此言。蕭蕭榆塞去。長劍倚崑崙。

李瑞徵曰法曹遼左傑士故詩  
特雄健多姿寫慷慨胸懷畧盡

